

**2 Utaáchich kuraka
Kirakaa yuw Israelchichee
Urkareewaa kamanku anoo
pakich kamanchintspa (1
Utaáchchee kuraka napangcha
yuwash pakich kamanku
anshu)**

¿Chakaja anoo yandarang?

Israelchich tputs zapan kirakaa yandaranganaya. Anush kamanirangana yuwaan urkareewaa ashirangana anootsi. Zapishsha Babiloniyah taarangsin, kirakaa natstarangusin, washunandari minamari kirakaa yandaranganaya. Itaru, kiraksha kizpur tuwapeeru, chawpishtarangusin, na in tsimbun kirak taariya. Dapiyarini tsiparangu, anumun iwaz yuwaan kurakaam kinarangana anoo ichingaru kamankiya.

¿Chakaama yandarang?

Israelchich tputs waanpatatin mbiztaruneepa atusin, kirakaa yandaranganaya.

¿Mayaamaja yandarang?

Israelchich tputs zapan yutarit taarangana anumand Apanllsha waneerangu, arapich tputs kuseersin, kasiyarusin, Babiloniyp tsap machtaranganaya. Apanlleetsimari chinangtsa. Kurakangaz támararintspa, tápani atusin, kirakaa yandaranganaya.

¿Mayaatseeja kamanik?

Na yuwari kamanku anoo kamanchintspa.

- 3). Israelchich kurakawin nda Apanlee tachitaranganaya. Waanshuchee tputs mantsir tayaspatarangusin, tiptsirsha ichingarusin Apanlee kasaranganaya. Apanll waana kuk kamanimapanee tputsee wanimaaam zanganirangitaa, kaapa nda mazinaranganaya. Ashiriya, 210 masach tushiychu, Apanll Asiriyashchee kurak wasundururpatari zanganirangu, Israelchichee kasirangana. Tputsee zapan pacharangusin, zapantam muchchureem ínarangusin, waanpee watsapun machtaranganaya. (1 Kurakarini 13—2 Kurakarini 17)
- 4). Utaáchichsha kurak ashpatam Apanlee itsinsaru tachitarangana. Mishat, Apanlee kuk kamanipan mazinarangusin, Apanlee kuk natumasamaam payuranganaya. Itaru, tputs uru wand apanllputsee chinaranganaya. Nda itsinsaru Apanlee chinarangana. Isáysarini tputsee waneerangu, misha Jeremiyasarini waneerangu, ashtaa tputs yutaritshishee kasamaam ngataranganaya. Ashiriya, 345 masach tushiyramchu, Apanll Babiloniyahchee urkar wasundururpa zanganirangu, Utaáchchee izuuru kasiranganaya. Tputsee zapan pacharangusin, yakat Irusarinaa sumaspat tirooku, Apanleetstam pang' tirooku sheersin, kasaranganaya. Tputseetstam putayarusin, muchchureem waanpee watsapun machtaranganaya. (1

Kurakarini 13—2 Kurakarini 25)

Utaáchich kurak kuzizimun taarangana anu

2

*Ashiriya, na kamanchintspa yuwaa Elíyas
wanutspatari Apanllip kárirangu anootsi*

¹ Ashiriya, yuwash Apanll Elíyasa, Nuw shiyyaa kambusurush kuseeruri, yamachinllpa, tárang, an zar tatsamoorang, Elíyas Elisewpa yakat Guigaalap naataranganaya. ² Elíyas anushsha Eliseewaa tsiyatarangiya. Neetsiri shiy taarapcha. Watam na in Apanll nuwaa naangi atuwa yakat Betelpi, tárange. Itaru, Elisewsha, Zurampatari Apanll waana paritam, misha shaana yasaritamish. Nuw shiyyaa shaani zanganimaam zandkeez, tárange.

Tárange, yusur washunandtam yakat Betelap naataranganaya. ³ Itaru, anushsha Apanllee kuk kamanimapan Betelash taaranganaya. Ansha Elisewpa tsiyatamaam chamayangaranganaya. ¿Shiy yasarish, yuwaa na Apanll shiyyaa ipunshish kurakarish Elíyasa yamachu anootsee? tárange. Elisewsha, Aaja, yasarina. Itaru, wappa. Siy arangeem anoo tsiyatintspa, tárange.

⁴ Tárange anumun, yusur Elíyas Elisewapa tsiyatarangiya. Neetsiri taarapcha, watam yusur Apanll nuwaa naangi atuwa yakat Jericopi, tárange. Itaru, Elisewsha, Nduni. Zurampatari Apanll waana paritam, misha shaana yasaritamsha. Nuw ¿tamareeja shiyyaa shaanitari zanganchee? tárange.

Ashiriya tárangu, yusur washunandtam yakat Jericop naataranganaya. ⁵ Itaru, Apanllee kuk kamanipan yuw yakat Jericosh taarangana, anshitisin shitungaranganaya, Elisewpa tsiyatamaama. Anush Elisewaa chamayangayarusin, tsiyataranganaya. ¿Na in shiy yasarish yuwa shiyya mayistorurish kurakareetsish Apanll yamachu anootsi? táranganaya. Elisewsha, Aaja. Nuwaana yasaktana. Itaru, wappa. Siy arangeem anoo tsiyatintspa, tárangiya.

⁶ Anumunsha yusur Elíyas Elisewaa, Neetsiri shiy Elisewaa, taarapcha, watam nuwa Apanll waana zangankuwa. Kung Ortagupsha naangi atiya, tárangiya. Itaru, Elisewsha. Nduni, nuw zu-rampatari shiyya Apanll paritam, misha shaana yasaritamsha. ¿Tamareeja nuw shiyya shaanitari zanganchee? tárangiya.

Tárangu, yusur washunandaritam naataranganaya. ⁷ Itaru, Apanllee kuk kamanipansha kusaranganaya; 50 arapeetari xiyartaranganaya. Elíyassha Elisewpa Ortagumun wing xiyartaranganaya. ⁸ Ashiriya, Elíyassha wamaree yusheeru, supshishitara sheeru, anpasha kungoo tpuw ashirangu, kungsha tawatataraa ashkachu, tsapsha katspungtataraa sheeru, kungush arachich ashirangiya. Anumun tsapumun puzamun kitaranganaya. ⁹ Ashiriya, Eliyas Elisewpa kungoo kiteerandsin, naantatssin, anush Elíyas Elisewaa, Naturi kamaningandama. ¿Mayaatseeja shiy zandkish? Ndatuma nuw shiyya kasaruri, ¿mayaja nuw shiyya istachee? tárangiya. Elisewsha, Nuw zandkina. Nuwaam kapunguri

wizpurirish panangandama. Apanllingaz wani nuw zandkina, tárangiya. ¹⁰ Elíyassa, Yuw nuwaa shiy mashkish an ¿antaati kamiranaja? tárangiya. Itaru, wánari shiy yuwaa naakchi anoo pakchush, uru shiyaa istachina, tárangiya. Itaru, nduniya waritakush, Apanll wani shiyaa istacheeja, ndambari, tárangiya. ¹¹ Ákatatssin, tsimbunartisin shurangaktaatssin, yap nda chinarana anush kapaach pshiyrshini sumas tamapari ashiru kurakurtaru, misha kapaachsha sumas ashiritam kurakataru tuwasineeru, iriputaranllu anoo paranganaya. Anshurisha Elíyasaa iwanlltarangiya. Elíyasaa izaroorangu, kambusur kapung pantsatarangu, anshurisha Apanll Elíyasaa náringarangiya. ¹² Yuwaa ashkachu anoo Elisewsha parangu, kapung, Aay, tárangiya. Ichee, ¿mayaamsha ashiksha? Watam shiy kizpur Israelaa tsap sundar urkar tamapari ashiru ksutarangshawa, tárangiya. Tárangu anumun, Elíyasaa ndusha parangeeya; Elíyasaa kanatsiparangiya.

Ashiriya, na kamaneena yuwaa Elíyas kanindap wanutspatari kárirangu anootsi.

Ashiriya, na kamanchintspa yuwaa Elisewsha kungoo yusur kanapumaam katsprungtarangu anootsi

¹³ Ashiriya, Elisew mang' kapung mantsarangu, wamaree putayaru, apusash izichirangiya. Sheeru anumunsha, yuwaa Elíyas wamar kasayaranllu, tamooramchu, anootssha Elisew yarangiya. Sheeranllu, yusur wapitam kung Ortagup kanapurangiya. Anumunsha,

kungumun wing xixeeuwamach ashirangiya.
¹⁴ Ashiriya, Elisew, ¿Yapinaareeja Apanllee nuwaam istamaama, yuw Elíyasaa kizpur istarangu anoo? tárangiya. Ndaturi tsiyatam iwatsparu, apinlliri tpuw ashirangu, anush yusur katspungtarangiya. Tsap ashiru arachich tutsupungtarangiya. Anumunsha Elisew kanapeeranllu, wapitam kung arachich Ortagoo kitarangiya. ¹⁵ Ashiriya, Apanllee kuk kamanipanshitisin yakat Jericoshuchshitisin parangusin, Elisewaa, Na in yuw Apanll wan Elíyasash tárangu, an Elisewashsha pshtuyanlliya, táranganaya. Tárangusin, yuwa Elisew naantachu anoo chamayangani atusin, chiyzartarangusin, naatarangsin, chamayangarangusin, tutunll-tayarusin, timuchartaranganaya. ¹⁶ Sheersin, Elisewaattsha, Ashiriya, na in shiy kurakaam kinarangush, shiyaam istampaneem kizpureew 50 tputs taariya, táranganaya. Shiy kamachtangi Elíyasaam nachungamaama. Mangishini chinakuni, Apanlpari wan yamayaru, iwarsha machimun wayayaru, kasarangiya. Nduntaati ashiru, wazawpeezuwa arap wayarangiwa, Apanllee kuk kamanipan táranganaya. Itaru, Elisewsha, Nduni. Minumtiyam tputs nachungamaam zanganintspa; watsta, tárangiya.

¹⁷ Itaru, ashiritaa uwshtisin aranginasha, Nduni; nachungayani, táranganaya. Arang tamundarangusin, Elisewshat, Ashiriya nachungashintsi, watam átssawa, tárangiya. Ashiriya, tputssha 50 nachungamaam naataranganaya. Ashiriya, uwshtisin Elíyasangaz nachungarangusin, tuchip zar

nachungakatanusin, nda Elíyasaa paranganaya.
 18 Ashiriya, kanapeeshinusin, yusur yakat Jericoshutam kusatangaranganaya, yapitam Elisew kasanllina ambtamta. Anushsha kusarangsin, Wanindaja, tárangusin, Elisewsha, Ashirucha, nuw siyaa tárangashina. Naarintspa nachungamaama. Ndunartanda, nuw siyaa tárangingawa, tárangeiya.

Ashiriya, na kamaneena yuwaa Elisew waanisha wapitam kanapurangu anootsi.

Ashiriya, na kamanchintspa yuwaa Elisew Apanllpa wizpuri kungoo yutaritaa wanasiireem ínarangu anootsi

19 Ashiriya, Jericoshuchsha tputs Elisewaa kamaniranganaya. Napanlla: ashchiri in yakat wanasiri. Na tamaru shaana paksha. Itaru, kungsha yutarita, misha tsaputam yutarittamta. Nda tatsumim wanasir kxunkiya, tárangeiya.

20 Ashiri tárangusin, anoo mazinarangu, Elisewsha, Nuwaam mangawash kaneeschish yum pshtayarus, panangasinda,* tárangeiya. Ashiriya, uwshtsisin anuritam mangawash kaneeschish yumee pshtayarusin, Elisewaaam panaranganaya. 21 Elisewsha kungup naayaru, yumee kungupa tayamuyaru, kungush tuchumkachu, tsiyatarangiya. Apanll waana kamachtakiya. In kung kizpurshapari wanasir taachiya. Nimun kung minumtiyam tsipats taacheeja. Mishat, ashiritam tsap yutarit taachtamtaja. Izuuru wanasirsha taachiya, tárangeiya.

* **2:20** Márkosa 9.49-50 tsiyatsis nipta tatsamooru taaritamta.

22 Ashiriya, anuritam zar kung ichingaru wanasisirsha taarangiy. Yuwari Elisew tsiyatarang ambiritam ashirangiya.

23 Anumunsha sheeranllu, Elisew yusur waanpeetam yaktarinip Betelap kanapeeranllu, naatarangiy.* Ngootsish naantachu, machip káreeranllu, anush tputsee kanungasee zapan chamayangarangiy. Anshat tputs, Kapung tayutaritteeni; ipazapani, atusin, Elisewaa michitaranganaya. Kapung tsiyatkusin zamangaranganaya. Káreerush naattacha. Shaanitarisha purimchish paxarush, tárangeanaya.

24 Elisewsha anoo mazinarangu, yap atana amb tasaseeru, nllur kanungas shaneerana, anoo napeeru, Naturi uru ashparitaatssis Apanllimun sur tayutaritchintspa, tárange, anuritam chaniw tsimbun manginash shitungarangiy. Sheeru, 42 tputs shaneerana anoo zayaru, wanutsee izich, izich shimbayaru, kasarangiy.

25 Ashirangu, anumun yusur Elisew aranginasha machip Karmelup naatarangiy. Anumandsha kanapeeshinu, wapitam yakat Samariyash kusarangiy.

Ashiriya, na kamaneena yuwa Elisew kungoo tsapuptari wanasisir yareeru, watsapuniptam Samariyap kanapurangu anootsi.

4

Ashiriya, na kamanchintspa yuwa Elisew kiz yakat Sonemshuchpa chinrangana anootsi

* **2:23** Lukasa 10.30 tsiyatsis nipta tatsamooru taaritamta.

⁸ Ashiriya, minush zar Elisew yakat Sonemap pangati átu, naayaranllu, anushsha kiz kurikpan mang' wanasis taarangiya. Ansha, Naani; nuwash pangis kusangi. Nuwsha shiyaam katungats panachinllpa, tárangiya. Ashirucha, Elisewsha amb naakchu, anoo pangus tushiyku, anush uru pshtuyaru, katungtariya. ⁹ Ashiriya, ansha kiz wazaranlee tsiyatarangiya. Napanlla; nuw mangishi chinakuri, in tputs watam ning naakchu, urutari nish iyash kis napkiya. In tputs Apanlee kuk kamanipancha. Kizpur Apanlee chinakiya, tárangiya. ¹⁰ Ashiriya, nuw mangishi chinaktana. Minum íwar taramzimun tanda-punuyani. Sheeruni, anush minum wach wayayaruni kasayani. Waamatari maashi, minum misa, misha kuxinshishi, anumunsha mbarin wayayaruni kasayani. Amb sheeruch, amuy kuskamchu, iyangaz paseektakatu, anshurisha kanuschiya. Wanshutaritam maashiya, tárangiya. Wazaranllsha, Ayu táyaru, wayaranganaya.

¹¹ Anumunsha, Elisew paseektakatu, kusarangiya. Anshurisha maakamchu, yuwash maasheem wayarangana anshurisha kusarangiya. ¹² Kuseeru, muchchureetssha Guehasiya kamachtarangiya. Natu naayarush, kizaa kuruzungi, tárangiya. Ashiriya, muchchursha kuruzurangiya. Kizsha anshutam kuseeru, ¹³ Elisewsha muchchuree, Shiy kizaa kamaningcha. Shiy iyaa kizpur chinarangush, na nish wanasis kusaranginiya. Ashiriya, nuw ¿tamaycheezi? ¿Mayaja istaychi? ¿Mayaja mangush chinak? ¿Ndusha yuwamand nuwaa istarangu anumand kurakpa tsiyatamaam waritak? ¿Nda

ashku sundarpa urkaree? tárangiya. Itaru, kizsha Guehasiyaa, Nuw nish wanasis taakina; yaanandari kis taakaniya, týaru, Guehasiysha Elisewaa kamanirangya. ¹⁴ Elisewsha, Ashiriya, ¿tamaychinaareezich anoom kizaama? tárangiya. Muchchursha Guehasiy, Nuw yasareezi, tárangiya. Itaru, wip wanindaja. Mishat, wazaranllsha kizpur wachina, tárangiya. ¹⁵ Elisewsha, Natu kizaa, Naani átanda, tángcha. Nuw tsiyatchima, tárangiya. Ashiriya, muchchursha kizaa kuruzurangu, uwsha kuseeru, wachunung xiyxeew ashirangya.

¹⁶ Elisewsha kizaa tsiyatku tárangiya. Minush masach iparish wanindachiya. Pachipushapsha nuw pangchina, tárangiya. Kizsha, Nduni kurakaa. ¿Mayaamsha mangutish ngichiksha? ¿Tamashtaja shiy Apanlee kizpur chinakush, nuwaatssha yuwaatsi shiyaa istaki anootsshitu ngutish michitchish? ¿Ngutish tamasingarush tsiyataksha? kiz tárangiya. Itaru, Elisewsha, Ashiritaa, Apanll shiyaa istachparee, tárangiya.

¹⁷ Yuwari Elisew tsiyatarangu, anuritam tatsamoorangya. Kiz mireerangu, minushsha masach wip wanindarangya. ¹⁸ Ansha nllur kanungarangya. Itaru, minushsha zar waparip mazar kusarangya. ¹⁹ Anush nllur kusarangu, wanguytarangu, kizpur tanurangya. Aay tárangiya. Muchi kizpur tpingakiya. Tsipakchima, nllur átar ashirangya. Ashiriya, waparsha muchchuree kamachtarangya. Nee nllura wapitam wanirip machtatcha, tárangiya.

²⁰ Ashiriya, muchchursha yamayaranllu,

yusur wapitam waniriptam machtarangiya. Kuseeramchu, wanirsha nlluraa wanumbimun tunuxinayaru, pachipupuw ashku, zar wachamuree tsiparangiya. ²¹ Ashiriya, anoo wanirsha nlluraa yamayaru, yuwash Elisewaam maash wayarangana, anush wachush maashimun tsiparee tuchakayaru, kasarangiya. Wanásir wachoo mbam shtandayaru kasarangiya. ²² Sheeranllu, wazaranlleetssha kuruzurangiya. Wazaranllpasha tsiyataranganaya. Nuwaam minum m'chachurish kapaachpatari zanganinda, nuwaam ipunshi. Nuwma Elisewap napatama. Sheeruri, kanaputama, tárange. ²³ Wazaranllsha, ¿Itaru, mayaamsha naturi naakatsha? ¿Antaati na in tsup kaneescheeja, shiy napatama átish? Mishat, ¿antaati na zar sápatooja? tárange. Kizsha wazaranlee, Mangish mantsarinllpa. ¿Mayaamaja mangish mantsachish? tárange. ²⁴ Tárangu, naamaam kapaachoo yamayaru, wayarangiya. Kizsha muchchuree, Pzaya; shiyma imazangi. Ashiriya, yuwash nuwaana kanapeeni tákchi, anush kanapchinipa, tárange. Shiy nuwaa tuxararishpa. Mapiyruni naayani, muchchuree tárange. ²⁵ Tárangu, muchchurpa naataranganaya. Anushsha tsap Karmelush kusaranganaya, yuwash Apanlee kuk kamanipan taarangu anshu. Ashiriya, Elisewsha arapiri yuwaa naanllina anoo parangu, muchchureetssha Guehasiyya kamachtarangiya. Napanganlla. Kizamanda Sonemshuch naanllinaya, tárange. ²⁶ Natu mikeerush iripeerush, chamayangashini.

Sheerush, yamashini. Mishat, ambiri
 mashangcha. ¿Tamarazinllinaja taarana? ¿Tamareeja
 wazaranll taar? ¿Wipatam tamareeja taar?
 Mashangcha, tárangu, muchchursha anuritam
 naatarangu, anushsha kizaa masharangu,
 kizsha, Wanásircha taarini, tárangeiya. ²⁷ Táyaru,
 Elisewash kusaranganaya. Elisewashsha
 kuskamchu, watsish tutunlltayaru, watsee
 kurichta ashirangiya. Muchchursha Guehasiya
 anoo parangu, Watsta; mundarinllpa, tápi
 átu, kusarangu, itaru Elisewsha, Nduni;
 ksangi, tárangeiya. Watam in kiz kizpur mang'
 mantsakuwa. Nda nuw yasarina. Nda nuwaa
 Apanll kamanirangiya. ¿Mayamasaja kizaa
 tushiyrangu, kizpur mang' mantsak? tárangeiya.
²⁸ Ashiriya, kizhat, Kurakaa, mazinanlla.
 ¿Antaati nuw shiyya nuwaantariipari ipareemi
 masharangina? Nuw shiyya ¿mayaamsha
 shiy nuwaa ngichiksha, tárangeinawa? Natsha
 ipari tsipayanlliya, tárangeiya. ²⁹ Elisewsha
 anoo mazinarangu, muchchuree Guehasiya,
 Mikeerush naamaam yarangcha. Neewa
 tushuwshi. In yátacha. Apus tputsee
 chamayangakchush, anpa tsiyatinllpa. Mishat,
 shaantari, ¿Tamarimta? tárinllpa. Mishat, shiyya
 tputs, ¿Tamarimta? átu, shiyya anoo yámeerush
 tsiyatinllpa. Naantachush, itsinsaru anush
 wanguyash kuseerush, nuwapa tushuwshi
 nlluramun wach wayangcha, tárangeiya. ³⁰ Itaru,
 wanirsha anoo mazinarangu, Elisewaa
 tsiyatarangiya. Zurampatari Apanll waana
 paritam, shaana yasaritamtish; shiy nuwash
 nda tachitkush, shiyapa nda ipunaruri, nuwaani

wapitam naamaam zandkeezí. Shiyaptari naamaam zandkina, tárangiyá. Ashiriya, Elisewsha, Ashiriya, waritachpari. Pzaya. Naayani, tárangiyá. ³¹ Tárangusin, ngootsish naantatssin muchchursha Guehasiya wasina imazayaru naatarangiyá. Anushsha kuseeru, nlluramun Elisewpa tushuwshini wayarangiyá. Itaru, wayaktaa, nda nllur yusur tamarangiyá. Ashirucha, muchchur Guehasiy wapitam iripurangiyá Elisewangazi, Elisewaatsshá kamanku, Nlluramun wayarangitaati, itaru nllur támkeeja, tárangiyá. ³² Ashiriya, anushsha Elisew kusarangu, pangush pshtuyaru, napku, maashimun nllur tsipar tuwinatam tamuru parangiya. ³³ Ashiriya, anushsha waanitari pshtuyaru, wachoo mbamari shtandarangiyá. Sheeru, anush Apanllpa tsiyatarangiyá. ³⁴ Ashirangu anumun, maashimun kárirangiyá, yuwamun nllur tsipar tamuru anumuna. Nlluraa tsipari pachipurangu, kuk kukpatartatam tuw sheeru, wachsha wachpatataritam kandaneeru, uwshat upatataritam kandaneeru, wanootsshá wanutspatartatam kandaneeru pachipurangiyá. Ashirangu anush, musásiritam nllur wanuts ashchiri ksánitaraa ashirangiyá. ³⁵ Ashiriya, Elisewsha chiyzayaru, anshuri tandapunuzish naanat ashishtar ashirangiyá. Sheeru, yusur nlluramun ambitam ashiru pachipurangiyá. Sheeru, anumun tuchparinshtini yusur nlluramun ambitam sheeru pachipurangiyá. Ashirangu, anumun musásiri nllur ksheendarangiyá. Arangich tsimbun kuwiz matayaru ksheendarangiyá. Ashkachu anush,

musásiri nllur wach naparangiya. ³⁶ Elisewsha muchchuree Guehasiya tsiyatarangiya. Na mikeerush nllur wanir kuruzungi, tárangeiya. Guehasiysha anuritam kuruzurangiya. Ashiriya, nllur wanir kusarangiya. Kizaatssha, Neewa, iparish támeenlliya, tárangeiya. ³⁷ Kizsha anoo wipaa parangu, Elisewash watsish tutunlltayaru, ungirtarangiya. Sheeranllu, wipaa yamayaranllu, yusur anoo pangusee shitungeeru, mang' kizpur ksarangiya.

Ashiriya, na kamaneena yuwaa Elisew nlluraa tsiparee ituyamarangu anootsi.

5

Ashiriya, na kamanchintspa yuwaa Naaman sundar urkar wánguyar yararangu anootsi

¹ Ashiriya, Naaman sundar urkar Síriyah tsap taarangiya. Síriyshuch kurak Naamanaa kizpur chinatariya. Watam Naamanpat wizpuririni Apanll waana istarangu, anoo tsapoo Síriya waa-matarishtisin watsapun yaranganawa. Itaru, an-sha sundar urkar wanguyamuna. Tsutashish tsutarangiya, yuwamash tas tutungataru anumashi.

² Ashiriya, yuwash Israelchichpa tsiyan-tarangusin, zapan xiyrangana, anush Naaman kizaa nllura putayaru, yamayaru, wizanlleem muchchuri wayarangiya. ³ Ansha nllur Naamanaa wizanlli, Zaranlleetsish kamaningi. Waani naayaru, yap Apanlee kuk kamanipan yakat Samariyah taaru, amb naakchu, wánguyar yarat, tárangeiya. Kizsha wazaranlee kamanirangu, ⁴ Naamansha anoo mazinarangu,

Síriyashchee kurak kamanirangiya. ⁵ Kuraksha Síriyshuch uwsha, Wanásircha. Na, napashini. Nuw kirak yandayaruri, Israelchicheem kurak zanganchima. Ashkachuri, waritachparee, tárangeiya. Anootssha Naaman mazinarangu, pangup naatarangiya. Anush kuseeru, kurikee mbammash 30 mil mburshimashi yarangiya. Sheeru, anumunsha 6 mil kurik mbammash oroo yarangiya. Anumunsha 10 wámaree yarangiya.

⁶ Sheeru, kurakapsha Israelchichip kirakaa yandama yáyanllu, naatarangiya. Anushsha kirakash yandamash tsiyatsis taarangiya. Nee kiraka yakchush, natstangcha; anush pangatsha. Naaman sundar urkar zanganchinllpa. Shiysa anoo yarangcha wánguyareetsi, tárangeiya.

⁷ Anootssha kurak Israelchich kirakaa yáyaru natstarangiya. Natstayaru, uwsha kizpur mang' mantsaku, wamaree putayaru, izichirangiya. Anushsha tsiyatku, tárangeiya. ¿Antaati nuw Apanleezi? Apanllcha tputseem taárash panatarasha. Mishat, taárashee itutsimaam yasaritamta. ¿Antaati nuw Apanllinawa, nuwaam amb táyarush yandapich? ¿Nuw anoo wanguya yarcheena ashiru? tárangeiya. Na mangishis chinantsa. In kurak nuwaa tuxaramaam zandkiya, tárangeiya.

⁸ Elisewsha yuwaan kurak wamaree izichirangu, anoo mazinarangu, tsiyatssee zanganirangiya. ¿Mayaamsha wamaree izichka? Waani Naaman ningeem naanpa, nuwangaz pakatu. Nuwash kuskachu, nuwsa yarchima. Ashkachuri, Naamansha, Zuraktishcha. Israelush Apanlee kuk kamanipani taarcha, táchiya, tárangeiya.

⁹ Naaman anoo mazinarangu, kapaachush pshiyrshini zaruyaru, naayaranllu, Elisewash kuseeru, pangusinung wach xiyarangiya. ¹⁰ Itaru, Elisewsha tiptsiree tsiyatssee kamanimaam zanganirangiya. Napanlla. Apanllee kuk kamanipan ateeja. Ortagup kung naayaru, anush arangich kuwiz tsimbun matayaru chumachpa. Ashkachu, uru wanguyarini mikeeru yarchiya, átcha, tárangeya.

¹¹ Naamansha anoo mazinarangu, kapung tsiyantarangiya. Kanapeeranllu anush tsiyatarangiya. Nuw mangishi chinaranguri, tárangeinatana. Kurak shitungeeru, ¿Tamarimta? táyaru, nuwanung xiyeeru, nuwaa tasaseeru, nuwaa patateeru, Apanllpa mashkachu, Apanllsha nuwaa yarchiya, tárangeinatana, tárangeya. ¹² ¿Antaati in kung' Damáskooja? misha kung Abanaja, misha kung Farfaraja, ¿antaati in kung anooja? Ancha kung' kizpur wanasisriya. Ichingarooma Israelshuchee kasiriya. ¿Nuw tamareeja amb ashtachi? ¿Antaati ashkachuri, anush wanguyari yarcheeja? amb tárange, kapung tsiyantarangu, kasayaru, wapitam kanapurangya.

¹³ Itaru, apussha naantachusin, Naamansha muchchur, Naamanaa, Mazinanlla. ¿Antaati Apanllee kuk kamanipan shiyaa yutaritaja tsiyatarang? Nduni. Wánariya mbamanaaree kamachtarangu, ¿ndunnaarshaparee kukoo payurangsha? Ashiriya, mangish itsinsaru chinangcha. Shiy naayarush, kungush chumangi. Ashkachush, uru nutsish wanasisitsha, tárangeya.

14 Kuraksha Naaman anoo mazinarangu, Ashiriya, waritachpari. Zuraktishcha, tárangu, Elisewaa kuk payurangu, arangtach tsimbun kuwiz matayaru kung Ortagush chumarangiya. Ashiriya, chumarangu, wánguyar yararangiya. Yusur wanuts ashchiri wanasisreerangiya, nllur wanuts tamapari ashirangiya.

15 Ashiriya, Naamansha anoo parangu, Elisewap tsiyatamaam wipunashpa naataranganaya. Ashiriya, anush kusarangsin, Naaman tsiyatarangiya. Na in nuw mangi kizpur kisa, watam minup tsap minumtiyam Apanllee kuk kamanipan kizpur wanindaja. Israelshumari kizpur taariya. Ashiriya, na nuw shiyaam maachee panachinllpa, yuwamand shiy nuwaa yararangish anumanda. Nuw shiyyaa tputsirtana, tárangiya.

16 Itaru, Elisewsha, Nduni. Zurampatari Apanll waana paritam, yuwaa átish anoo ayu táchéezi, ndambari, tárangiya.

Itaru, kuraksha Naaman, Ashiritaa, Neewa, yángi, Elisewaa tárangiya. Elisewsha ashiritaa ngatarangiya. **17** Ashiriya, sundarsha urkar Naaman, Ashiriya, na ayu tángandama. Nuw kapaachumun ush tsapureetsish pakich nuwaanpee yachima, watam na nimandari shaana nuwaa paritamtish, yusur apanllputsee chinacheezi. Ayamtaati yusur apanllputsee ungirtacheezi. Minumtaatsiri Apanlleetsimari Taarashipanee ungirtachima, tárangiya. **18** Ashiriya, minumari shiy nuwaa istangandama, Apanll nuwaa yutaritshishiri tachingamaama. Nimand naakchuri, nuwaa kurakarshiti, apanllputsiip

Rimonash pang' ungirtayani, tákchu, nuwamun uw putayaru, apanllputsinung tutunlltayaruni, tsimbunarishtini ungirtakchiniya. Ashkachi anoom, nuwaam Apanllpat tsiyatangandama, anoo Apanll tachingamaama, tárangeiya.

¹⁹ Elisewsha, Waritariya. Mapiyrush naattacha, tárangeiya.

Naamansha anuritam mapiysha naatarangiya.

²⁰ Ashiriya, Naaman naayaranllu, arapsha naanakchu, anoo Elisew muchchur Guehasiy mangush chinayaru, ¿Tamashtaja nuw kurakari Elisew kurikee ngatarang? Ashiriya, nuwnaa tachiteeruri, kamateeruri, mashatama. ¿Nduneeja nuwaam panachinda? tárangeiya.

²¹ Tárange, Guehasiy mikeeru yap Naaman naayaranllu, amb tachitarangiya. Ansha kurak uship napku, Elisewaa muchchur parangu, kapaachush pshiyrshini karuwarangiya. Karuweeru, masha-rangiya. ¿Maya k'kuz yutarit taaru naatatsha? tárangeiya.

²² Guehasiysha, Mangutariti pakaturi kusarangina, tárangeiya. Itaru, nuwaa kurakari zanganirangiya shiyaa kamanimaama. Apanlee kuk kamanipan tsimbun kanungaseew tsap Efrayinamand káyashinusin, kusataranganaya. Ashiriya, shiy kurikee nuwaam panamaam waritakcha, tárangeiya. Nuwaam panangandama. Tuchip mil kurik mbammash panangandama; anumunsha tsimbunatam kamarish panangandama, tárangeiya.

²³ Naamansha kurak anoo mazinarangu, Zuraktishcha. Ashiriya, neewa. Shiyaam kurik panachinllpa. Aranginashta 6 mil

kurik mbammash panachinllpa. Ngatinllpa, tárangeya. Táyaru, kurikeetstam, misha wamareetstam pursash tsimbunari pshtayaru, panarangiya. Ashirangu, tsimbun muchchur Guehasiyash ipunamaam zanganirangiya. Ansha muchchur yáyarandsin, Guehasiyipa washunand ipuneerandsin naataranganaya. ²⁴ Naayarandsin, machimun káreerandsin, anush kuskamchusin, Guehasiysha pursaa yaruwayaru, wansshutarisha pang' wayarangiya. Anumandari Naamanaa muchchuri, Kurakaripish kanapungtsa, tárange, waanpeetam urkarip naataranganaya. ²⁵ Guehasiysha Elisewash kuseeru, Elisewsha muchchuree masharangiya. ¿Yapimandsha káyashinsha? tárangeya. Guehasiysha, ¿Antaati nuw naareezi? Neetsiritcha taari; tárangeya.

²⁶ Itaru, ashiritaa Elisewsha, Na in ¿antaati nuwaa kamapshicheezish? Nuw parangtana. Tputs kapaachoo pshiyrshini kasayaru, karuweeru, shiyya tsiyatarangiya. Nuw anshutamana. Nuw kani anushpaz ashirangina. ¿Antaati na in kurikee chinamaam waritak? ¿Mayaamaja kurikee, misha kamazeetstam, misha mzatseetstam kizarunpat, misha opeejaatstamta, misha wakaraatstamta, misha m'chachureemtamtish, misha kizaatsitam m'chachureemish anoo ichingaru shiy chinachish? ²⁷ Ashiriya, yuwamand ashirangish anumand Naaman tsútash shiyya tsutachiya. Maachiritaatsish ichingaroom urutamari tsutaku taachiya, tárangeya. Tárange, Guehasiysha mazinarangu, Elisewaa kasayaru, naatarangiya.

Ashkachu, wanutsish tsutashish kizpur pshturangiya. Ashchiri wanutsee tsutarangu, wanuts túitungkayaru mburashsha taarangiya.

Ashiriya, na kamaneena yuwaa Guehasiy Naamanaa urkiree yarangu, itaru waanaatsisha tsutashish tsutarangu anootsi.

6

Ashiriya, na kamanchintspa yuwaa m'chukee kanachayarusin, Elisewsha Apanllpa wizpur pamuzingarangu anootsi

¹ Ashiriya, minush zar Apanlee kuk kamanimapan Elisewpa tsiyataranganaya. Mazinangcha, Elisewaa. Yuwash taakani anush kizpur iyaam ts-tsariya. ¿Tamareeja ashimash taachich? ² Ashiriya, natsha in naayaruni, Ortagap kung yasin katspayaruni, yaamataritam pangeemani panguyani. Sheeruch, anshunaapari taachchi, táranganaya. Elisewsha, Waritacha, naaksints, tárangu. ³ Itaru, uwshtsisin, Nduni. Pza, shiyaptari ipuneeeruni naayani, wipunashitisin táranganaya. Ashiriya, Elisewsha, Waritariya. Nuwapapa ipunachchi, tárangiya.

⁴ Elisew ipuneeerandsin, Ortagap kung naataranganaya. Kuseersin, yasinaa katsparanganaya. ⁵ Minum yasin katspayarusin, yusur minootssha katspaksin, anush m'chukee pataxirangu, kungush kanacharangiya. Ashirangu, yuwsha m'chukee kanacharangu ansha, Aay. Mayistoroo, m'chukee kanachachima. ¿Antaati nuwaantaja m'chukiri? Tputsee muchkir nuw yáyaran, tárangiya. ⁶ Itaru, Elisewsha,

¿Yuwaatsha m'chuk chipuyeera? tárangiya. Uwsha, Neetstanda chipuyeeru, tárangiya. Elisewsha yasin zangamich wareeyaru, yuwash m'chuk chipuyeeru, anush kapeetarangiya. Ashirangu, m'chuksha muzingarangiya. ⁷ Ashkachu, Natu, yanancha, tárangu, uwsha uwpatari yáta ashirangya.

Ashiriya, kamaneena yuwaa m'chukee kanachayarusin, Elisewsha Apanllpa wizpur pamuzingarangu anootsi.

Ashiriya, na kamanchinllpa yuwaa Síriyshuch tputs, Elisewaa putapani, tárangana anootsi

⁸ Kurak Síriyshuch kapung Israelchichpa waratarangsin, Síriyshuchsha kurak, Pzaa, piyam shaniyeeruni, nda tputs mazinaru, tsiyatani. ¿Tamayarinaareezich chiyamari kasichich? Piy sundarureetsini tushaneeyaruni, tsangangints, iyamari Israelchichee kasimaama, tányani, tárangiya. ⁹ Elisewhat anoo mazinarangu, Israelchicheem kurak mikeeru tsiyatssee zanganirangiya. Papcha. Síriyshuch tputs amb siyaam tsakakchinlinpa. Ashiriya, amb naamintspa, tárangiya. ¹⁰ Israelchichshat kurak anoo mazinarangu, wasundururee piyam zapan zanganirangiya. Ashirangu, Israelchich tputs ndusha Síriyshuchish tputs pshtuyarusin tsiparanganaya. ¹¹ Síriyshuchshat kurak anoo mazinarangu, kapung tsiyantarangiya. Wasundaruree tushaneerangu, ¿Chakshat tputs yuwaa yaani tsiyatarangani anoo kamaniranganaya? tárangu, ¹² wasundururshitisin, ¿Chakaja kurakaa, kamanich? Wanindaja. ¿Ndushat Apanlee

kuk kamanipan Elisew Israelash taaku an kamanirang? Watam an ichingaroo yasaruwa. Yuwaatstam shiy kirimshish tsiyatkish anootstam yasakiya, tárgananaya.

¹³ Ashiriya, kuraksha anoo mazinarangu, wasundururee, Natu saanpata yasangints. ¿Yapeeja Elisew taar? Yasakchuri, sundarureetsi Elisewaa putamaam zanganpi atina, tárgu, wasundururshitisin waanpatatin masharangsin, Elisew Ndutanaptanda yakat taaru, tárgananaya.

¹⁴ Kuraksha wasundururee kapaachush pshiyrshini zapan zanganirangiya. Anshat psaan Ndutanash kusarangsin, yaktaa ashchiri taturpirangusin, ¹⁵ putamshat puturi tarasitaranllu, Elisew muchchur chiyzayaru, wishchip shitungeeru, napku, sundar urutarisha yaktareetsini taturpim kapaachumunaw shaneersin parangiya. Anshat paranllu, Elisewangaz iriptaranllu, Ichee, ¿tamatarchee? ¿Yapeeja kamungeechich? tárangeiya. ¹⁶ Elisewsha, Nduni punirinllpa, watam iyaa anoo kasirinasha sundar ksutamapan taaruwa, tárangeiya.

¹⁷ Tárgu, Elisew Apanllpasha tsiyatarangiya. Apaa, shiy tputsiri kapung puniku, anoo shaana wizpurirish tuyamandangi, tárgu, Apanllsha Elisewaaam tiptsir wizpuree tuyamandarangu, Elisewhat tiptsir machip nap ashku, sundar zapan kapaachumun ashchiri tatsitaru, Elisewaaam tapachindamaam kámanarsin parangiya. ¹⁸ Anshat Síriyshuch sundar Elisewaaam pachamaam izuuru watsiritanasha káyamarangusin, Elisewsha yusur Apanllpa masharangiya. Apaa, shiyhat izuuru nee tputs

wachoo kzateerush ksangi, tárangeya. Apanllshat anuritam Síriyshuchee sundar ashpari izuuru wachoo kzatarangya. ¹⁹ Elisewsha mangu tamapingaku, Siy piyamcha ngoots masatarangis. ¿Antaati yuwangaz nachungakis an ningeem wanindaja? Piyamcha taaksha. Nuwnaa amb macheerunts, yámandachintspa, tárange, Elisew Samariyapsha yakat machtarangya. ²⁰ Anshat anush yakat kusarangsin, yusur Elisew Apanllee masharangya. Apaa, yusur tputsee wach yarangcha, tárange, Apanllsha yusur tputsee yararangya. Sundarsha yusur napartarangusin, mangu yap nda chinaraña amb yakat Samariyaatssha parangusin, Xam. ¿Yapshitiniya? tárangeanaya. ²¹ Israelshuchshat kurak anoo parangu, Elisewaa masharangya. Pachambeeruni kasayani. Watam nish yushindarangshawa, tárange, ²² itaru Elisewsha, Nduni. Pcharintspa. ¿Mayaamaja pachachich? watam tapazish putayariniwa. Katungtsina yáyarus, maritangints. Sheerus, kungutam waamaam panangints. Wayarusin, waani urkarpitam kanapunllina, tárangeya.

²³ Kuraksha Israelshuch, Zuraktishcha, tárange, katungtsee zapan yarangu, ashparitam martarangya. Sheeru, kungootstam yásirangya. Ashiramchusin, kurakaa tsiyateerandsin, Ashiri natunaa naamachinipa, tárangeusin, yusur urkarpitam kanapuranganaya. Anumandarisha Síriyshuch kurak tapazee izuuru kasaranganaya. Ndushat Israelshuchpa pachamaam chinaranganaya.

Ashiriya, na kamaneena yuwaa Elisewaa

pachamaam xapoorangana anootsi.

Ashiriya, na kamanchintspayuwaatssha katungats Samariyash yakat maringarangu anootsi

²⁴ Anumun yusur Síriyshuch kurak Benjedad wasundururee tushaneerangiyá. Sheerandsin, Samariyash yakat kuseersin, ashchiri yaktaa taturpiranganaya. ²⁵ Ashirucha, Samariyshuchsha tputs yaktarineetsini wach mbamari shtandaranganaya. Ashirangsin, tputs nda minumtiyam mazarip shitungarangsin, mariz kapung kayataranganaya. Iwariz maringarangu, katungats arap waritarangiyá. Burrumanda much 80 kurik mbammash waritarangiyá. Mukukumandsha chik pakchimanda 5 kurik mbammash waritarangiyá.

²⁶ Kuraksha Israelchich yaktaa tandapunuz-imun íwar waman kámanaru anumun naantach ashirangu, kizsha minum tsiyatarangiyá. Kurakaa, istangandama, tárangiya. ²⁷ Kuraksha, Apanlltaa shiyaam nda istaku, ¿nuwnaashtaja istachee? ¿Nuwshista shiyaam tiriku, vinootstam panaychee? ²⁸ ¿Amakshitish shiyataati amb átsha? tárangiya. Itaru, kizsha, Iy kizaptatini tsiyataranguni, Pzaa, iparini pachayaruni katungeeni, táranguni, nuwma ipareetsi pachayaruri katungaranganiya. Sheeruni, putamsha, Shiyshat iparish pachayaruni, katungeeni, táranguri, ²⁹ uwsha wipaa pishurangiyá, kurakaa kamanku tárangiya.

³⁰ Kuraksha anoo mazinarangu, kapung tsiyantarangu, wamaree putayaru, izichirangiyá. Tputsshitisin ichingarusin anoo paranganaya,

watam tandapunuzimun íwar naantach ashiranguwa. Sheeru, mantsirimashsha watunireem purusamashsha yáyaru kamartarangiya.
31 Ashirangu, Apanll waani nuwaa kizpur wanichindama. Naturi zar Elisewaa much turuchima, Safatarineetsi wipa. Zurampatari atina, tárangeiya.

32 Itaru, Elisewnaa pangush wachinanurpat shanee ashiranganaya. Kuraksha wasundururee amb pachamaam zanganirangiya. Itaru, ndatuma kurak wasundurur Elisewash kusaru, Elisewma wasina wachinanuree tsiyatarangu, Napangtsa. Na tputs kpachamash wasundururee ningeem nuwaam muchi turumaam tuzanganichiya. Itaru, siysa mazinantsa. Kurak wasundurur kuskachu, wach mbamari shtandayarush, annungiri kámanayarus, ksutangtsa. Paptsa. Urkar musápa kuzizimun kuschiya, tárangeiya. **33** Ashiriya, yuwaatsiri tsiyatkusin, ántarana anootsiri kurak wasundurur Elisewash kusaranganaya. Elisewaa tsiyatarangsin, Ashiriya, iyaam Apanll nda istaku, ¿mayaamaja Apanlleem kutachinee? Yaana yasachinipa, tárangeyanaya.

7

1 Elisewsha, Mazinangtsa. Yuwaa Apanll táranllu anoo kamanchintspa. Apanll ateeja. Pu zar asheetstam in zar, Samariyash washitungash katungtsee paxanxamaam taachpari. **7** litorumand tirik wasipur, minumpatamari kurik mbammash paxanxamaam waritachiya, Sebaadamandsha **15** litorumand minumaritam

kurik mbammash waritachiya, Apanll tárangiya, tárangu, ² kuraksha wasundurur Elisewaa, Ashimaam wanindaja. Apanllaapari kanindaawach tawateeru, katungtsee zangankachu, nda ashtachiya, tárangiya. Itaru, Elisewsha, Nuw zurampatari atina. Uru shiy kchiptartish pangchitampasha. Itaru, anoo shiynaa katungcheezish, ndambari, tárangiya.

³ Itaru, anushsha yakat washitungashinung tputs ipunpunar tsutashish tutungamash tsutamaw taaranganaya. Uwshtisin waanpatatin tsiyatstangand ashirangsin, ¿Mayaamshat iy neetsiri tsipatsingaz zandkuni, neetsirisha kutakuni kuxinataranll ashkiniya? ⁴ Nishutaatiya Samariyash pshtukchuch, tsipachtampachi, watam na in nish yakat katungats maringaranguwa. Mishat, neetsiritaatiya shanee ashkuch, tsipachtampachi. Nda ashishtamaam pza. Síriyshuch taarana ambinaa naayani. Apaz anush kuskamchuch, chiyaa chinakshitisina. Ashkinaareesinaya, chiy anshurishapa taachchi. Wandaya chiyaa natsaksin, pachakchusin, yaanipari tsipaktaateechi ashiru, táranganaya.

⁵ Tárangusin, psaanari káyarandsin, Síriyshuchipsha naataranganaya. Itaru, anushshat kuskamchusin, watsiri napkusin, tputs ndunarsha zaputarshat paranganaya.

⁶ Watam Apanll Síriyshucheem wasundurur tpuxtamaam wayaranguwa. Ashirucha, uwshtisin anoo parangusin, suwaranganaya. Yuwaa kapaachush pshiyrshini tputs zapan naanllpaz ashirangu, anoo mazinarangusin, suwaranganaya. Israelchichpari kurak

Hitiitshuchpa kurak, misha Ijiptoshuchpa kurak washunand ipuneerandsin, iyaam pachamaam naanllinaya, tárangusin, suwaranganaya. ⁷ Ashirangsin, anuritam psaan suwayaranllsin, ichingaru maachiritaa, watambureetstam, kapaachuwaatstam, chinuwaatstam ichingaru kasaranganaya. Pcharuneepa atusin, wanutsirinandari tit ashiranganaya. ⁸ Ashirucha, anush wanguyaw kurimunazish kusarangsin, wishchipiri xiyartayarasin, mazinaksin, zaputar ashirangiya. Ashirucha, sundarushsha watambur pshtuyarusin, katungtsee parangusin, yáyarusin, katungarangana. Waasheetstam waarangitamsinaya. Mishat, kurikeetstam, orootstam, chirikootstam waamatarihtisin yaranganaya. Ashirangsin, zapan maacheetsi yáyarusin, pishuranganaya. Sheersin, minushsha tamb pshtuyarusin, yusur maacheetsi yáyarusin, pishurangitamsinaya. ⁹ Ashirangsin, waanpatatin tsiyatarangsin, ¿Antaati yuw piy ashkini an wanasireeja? Na in zar ¿ndusha tputsee kamaninda át? ¿Mayaamsha kamapshíkiniya? táranganaya. Pushapari zar tsiyatsis mazinakchusin, iyaatssha wanichinllinaya. Ashiriya, nda amb ashimaam, pzaya, naturi naayaruni, kurakap pang' kamanini, táranganaya.

¹⁰ Tárangusin, kanapeersin, yaktash kusarangsin, sundarootssha wachoo ksutamapanee kuruzuranganaya. Anootssha kamanirangsin, Síriyshuch sundar taarangana anoo parangtanicha. Ichingaru tputs wanindaja. Nda minumtiyam tputs paranginiya. Itaru, maachisha

ichingaru anshuri taariya. Kapaachutam
anootsiri kasamawa. Watamburitamsin
ichingaru anuritam kasamawa, táranganaya.

11 Ashiriya, sundarsha mikeeru kurakaa
ksutamapani kuruzurangiya. **12** Kuraksha
psaanirita chiyzarangiya. Wipunashee
kurakpatatin tsiyatarangiya. Paptsa.
Síriyshuch iyaa tamapingapani atusin, mangu
suwakpaz ashiranganaya. Manginashpari
iyaam tsangamaam tapishuranganaya.
Yuwaa iy marizimun kiyung kachiykini
anoo yasarangusin, iysha katungtsingaz
shitungachuni, uwshtisin iyaa putayarusin,
kchitaatsiritani kamuriyarusin, kurakaamsha
panachinllinaya. Sheersin, uwshtisin
kuzizimunni yaktarinshini pshtuyarusin,
iyashchee izuuru kasipani, tupsinaya, mangu
tamapingaksin, ashiranganaya, kurak tárangiya.
13 Tárangu, wipunashsha tsiyatarangiya. Ashiriya,
¿tamaycheezich? ¿Ndushat zameetpa tputs
kapaachumun zanganinda át yasamaama?
Wandaya anush taakamchusin, pachakchusin,
¿tamaycheezich? Waaniparee ashkitaateesinaya.
Watam iynaa Israelchichini neetsiri ichingaruni
marizimun tsipachtamchiwa, táranganaya.

14 Tárangu, tsimbun kapaachoo pshiyrshini
yáyarusin, kapaachpatari sundaroo Síriyshuchip
yasamaam zanganiranganaya. **15** Ashiriya,
uwshtisin sundar amb naayarandsin, anush
kusarangsin, yapshat suwayaranllina ambshat
tachiteerandsin, kung Ortagup naataranganaya.
Napkusin, zapan maacheetsi ipantstaranganaya.
Watam mikeersin suwasuwaranganawa. Ichin-

garu wamareetsitam, misha anichoowaatsitam apus ipantstambach ashiranganaya. Ashiriya, anoo parangusin, kurakap kamankatssin, yusur wapitam kanapuranganaya. ¹⁶ Kuseeramchusin, kamankusin, tputssha ashpari ichingarusin turut ashirangsin, Síriyshuchip watambur machee yakatssin naataranganaya. Katungtsee zapan yaranganaya. Ashirangsin, Apanllee kuk kamanipan Elisew kamanirangu anuritam tuminuranganaya. Ashiriya, tirikoo 7 litorumand minumpa kurik mbammash tupaxanxaranganaya.

¹⁷ Sebaadamandsha 15 litorumand minumtam kurik mbammash waritarangiya. Kuraksha wipunashee kamachtarangu, Shiy yaktaa washitungash ksutangcha, tárangu, itaru tputsshtisin turut ashirangsin, kurakamun wipunash ush kata, kata ashirangsin, uwsha annungiri wachunung pantsarangu, anootsirisha tsiparangiya. Ashirangu, Elisew kuk tatsamoorangiya.

¹⁸ Yuwaal Elisew Israelschuchee kurak wipunashi kamanku, Pu asheetstam in zar nish yaktash Samariyash washitungash paxanxshish taachiya. 7 litorumand tirik, misha 15 litorumand sebaad minumaripari kurik mbammash waritachiya, átu, ¹⁹ kuraksha wipunash Elisewaa, Nduni, ¿mangutish ngichkush átsha? Apanlltaapari kanindaa tawateeru, nda ambinaa ashtachiya, tárangu, itaru Elisewsha, Nduni. Nuw zuraktana. Uru shiy kchiptartish pangachsha. Itaru, shiynaa anoo katungcheezish, ndambari, tárangu, anuritam tatsamoorangiya,

²⁰ Ashirucha, anuritam tuminurangu, yaktaa washitungash tsangakatu, anshuri wachunung tputssha zapan turut ashirangsin, kurakaatssha wipunash ipantsaranllusin, izuuru tsiparangiya.

Ashiriya, na kamaneena yuwaayaktash Samariyash marizimun kiyung kachiyarangana anootsi.

13

Ashiriya, na kamanchintspa yuwaayowakas Israelchicheem kurak kinarangu anootsi

¹ Okosiyasarini, wip Jowas yakat Utaásh 23 masach kurakaam kinaru taachu, anumunshat Jehúwarinsha wip Jowakas Israelchicheem urkar yakat Samariyash kinarangitamta. Sheeru, uwshat 17 masach ksutarangiya. ² Itaru, taárashsha kizpur yutarit taarangu, Apanllee kuk kapeetarangiya. Nabatarini wip Jerobowam apanllputsee Israelash tsap wayarangu, uwsha ashirangtamta. ³ Ashirucha, Apanllee tatsiyuntarangu, Apanllsha Israelchichee zapan masach undararimarisha kasimaam wayarangiya. Waani Asael Síriyshuch kurak, wipatam Ben-jadadamarisha kiyung yachaku taachpa, tárange.

⁴ Ashiriya, Jowakassa anoo parangu, uwsha Apanllee masharangu, Apanllsha mazinarangiya. Watam Apanll yuwaay Síriyshuch kurak Israelchichee kiyung yacharangu anoo paranguwa. ⁵ Ashiriya, Apanllee masharangu, Apanllsha Israelchicheem kapung istarangu, tapachindampaneem tputsee wayarangiya. Uwsha Israelchichee tapachindarangu, Síriyshuchsha kurak ndusha Israelchichee

kiyung yacharanganaya. Anumunarisha wanasisr taaranganaya. Sirútama taarangana ashirangtamsinaya. ⁶ Itaru, Apanll ashirangtaa, wand yutaritshishee nda kasaranganaya. Jerobowamchich yutaritshishee chinaksin, Israelaatssha tayutaritaranganaya. Watam Samariyash yakat apanllputs Asera taarangu, anoo ungirtaranganawa.

⁷ Ashirangu, kurak Jowakas ndusha zapan wasundurur taarangiya. 50 sundar taarangiya. Kapaachshat pshiyrshini tapazpan 10 payuranganaya. Ashirangu, 10 milomarisha tiptsir washunand taarangiya. Watam Síriyshuch tputs zapan pacharanganawa. ⁸ Ashiriya, nee kurakaa Jowakasa taárash arangeem yasamaam zandkus, Krónikash kirak yandam taartanda. Israelchich kurakaam kinatarangchina anoo ichingaru kamankiya. ⁹ An kurak tsiparamchu, Samariyash mapuranganaya. Ashirangu, anumun yusur wipsha Jowas anush kurakaam kinarangiya.

Ashiriya na kamaneena yuwaan Jowakas Israe-lash tsap kurakaam kinaru taarangu anootsi.

Ashiriya, na kamanchintspa yuwaan Jowas Israe-lash tsap kurakaam kinarangu anootsi

¹⁰ Utaáchchish tsap kurak 37 masach taaramchu, anumun Jowakassha wip Jowas Israelshucheem urkar kinarangiya. Uwshat yaktaa Samariya ksutku, 16 masach taarangiya. ¹¹ Itaru, anumunsha aranginasha yutaritshishee chinaranganaya. Apanllee kuk izuuru kapeetaranganaya. Yuwaatsitam Jerobowam,

Nabatarani wip ungirtarangu anootsitam ungirtaranganaya. Israelchichee yakat tuyutaritarangu, ambtam ashiranganaya.

¹² Ashiriya, nee tsiyatssi arangeem yasamaam, misha kurakaa Jowasa taárash ichingaru yasamaam zandkus, undararpa Amasiyaspa waratarangana anootstam yasamaam zandkus, kirak Krónikash ichingaru kamankiya, yuwash Israelchichee urkar kamanku anshu. ¹³ Kurak Jowas tsiparamchu, Samariyashtam kurakawaa mapurangana anshutam mapuranganaya. Ashiramchu, Jerobowamsha uwsha kurakaam kinarangiya.

Ashiriya na kamaneena yuwaan kurak Jowas tsi-parangu anootsi.

Ashiriya, na kamanchintspa yuwaan Elisew kurakaa Jowasa waneeramchu, tsiparangu anootsi

¹⁴ Ashiriya, Elisew kizpur tsipamaamari wanguytarangu, anush kuraksha Israelchich Jowas pakatu kuseeru, Elisewaa paxaneeru tanuku, Shiyaa Elisewaa, kizpur chinakina. Shiy sundar tamapari ashirush, Israelshuchee tputs wanasisr ksutarangsha, Jowas tárangeiya.

¹⁵ Elisewsha, Timbanllizee wasappatari yángcha, tárange, Jowassha anuritam yarangiya.

¹⁶ Elisewsha, Natu, timbanllzirish tsak ashimaam yarangi, tárange, Jowassha timbanllizee tsak ashimaam yáyaru, yusur Elisewsha kurakamun uwi putayaru tsiyatarangiya. ¹⁷ Wach tawatangimasi yap zar yaku ambi, tárange, kuraksha Jowas pangusee wach tawatarangu, Elisewsha, Natunaa timbanllizpa tsak shingcha,

tárangiya. Ashiriya, uwsha kurak Jowas timbanllizee tsak ashirangu, Elisewsha, In wasap watacha tapachindampani Apanll wizpuri. Afekash tsap shiyamari Síriyshuchee urkari kachingeerush, kasachsha, tárangiya. ¹⁸ Tárangu, anumun, Yusur wasaparish yángi, tárangiya. Jowassha ayu átu, wasapaa yusur yarangu, Elisew, Natu, yusur wasappa tsapumun xum xum shingi, tárangiya. Kuraksha Jowas tsapumun tuchpari xum ashichu xararangiya. ¹⁹ Elisewsha anoo parangu tsiyantarangiya. Wanariya arangeem zameetpa, nda ashku, arangtach minum matayaru xum ashirangush, Síriyshuchee kurak shiyamaripa ashpaatsiri kasitsha. Itaru, watam na tuchpanandari xum ashirangshawa. Ashiri tuchpamaritampari tapazpa kasitsha, tárangiya.

²⁰ Tsiyatam iwatsparamchu, anush Elisew tsiparangiya. Ashirangu, anshurisha Samariyash yakat mapuranganaya. Anumunsha zapan masach tushiyramchu, tputs washchireew Mowabshuch tputs zapan kusaranganaya. ²¹ Anpur zar tputs Israelshuch tsiparee mapi átu, tsapoo ktsiytu, anoo washchirshitisin tputs parangusin, tsiparee yáyarusin, yuwash Elisewaa mapurangana anush wach kapeeteersin, kasaranganaya. Itaru, tsipar Elisewmun kandanirangu, musásiri támeeru chiyzarangiya.

²² Yuwapur kurak Jowakas taarangu anpur Síriyshuchsha kurak Asael ashparita Israelchichee putarangiya. ²³ Itaru, Apanllsha Israelchichee tputs kizpur chinrang, naynirangya.

Yuwamand sirútama Aprahamarinpa, misha Isaakarinpa, misha Akoparinpa kizpur chinarangana anumand Israelchichee tputs kapung chinarangiya. Nda undarar kiyung yachamaam ksutarangiya. Nduntam izuuru arap kapeetamaam zandarangiya. Ashirucha, na in wandaritam Israelchich tputs taakanaya.

²⁴ Asaelsha kurak Síriyshuch tsiparangu, anumunsha wip Ben-jadad kurakaam kinarangiya. ²⁵ Jowassha, Jowakas wip, Ben-jadadpa tuchip tapazpa waratarangu, yaktaa zapan itutsirangiya. Sirú yuwapur waparin Jowakas kurakaam kinaru taarangu, anpur Ben-jadad anoo yakta ichingaru wamari kasirangiya. Ashirucha, Jowassha Ben-jadadpa tuchip pachakatanusin, tuchpaatsiri wamari kasiyarusin, Israelchichee yakta waamatam yanpurangiya.

Ashiriya, na kamaneena yuwaan Elisew tsiparangu, anumun Jowassha kurakaam kinarangu anootsi.

14

*Ashiriya, na kamanchintspa yuwaan Amasiyas
Utaáchcheem kuraka kinarangu anootsi*

¹ Tsimbun masach tushiyramchu, yuwamun Jowakas wip Jowas Israelash kurakaam kinaru taarangu, anumun Utaáchich Amasiyassha, Jowas wip uwsha kurakaam kinarangiya. ² Amasiyas 25 masachirini taarangu, kurakaam kinayaru, Irusarinash tsap 29 masach taarangiya. Wanirsha sur Jowadana taarangiya. Ansha kiz Irusarin-shuchimuna. ³ Ashirangu, an kurak Amasiyas

wanasir Apanlee kuk tuminurangiya. Itaru, nda kaapa sirútama Dapiyarini Apanlee kuk izuru payurangu, nda ashirangiya. Apanllputsee yuwaa waparin chinarangu anootstam uwshat chinarangiya. ⁴ Ashirangu, nda izuuru apanllputsee kapeetarangiya. Wandaritam apanllputsee ungirtaksin, kzammashee mbutaranganaya. Anush maacheetsi apanllputseem muchirangtamanaya.

⁵ Amasiyas kurakaamsha kizpur kinarangu, kapung tsiyantarangu, yuwamand sundar urkar waparina pacharangana anumand uwsha ashparita sundar pacharangiya. ⁶ Itaru, undarareetsinaa wip nda pacharangiya. Watam Móysisarini kirakaa yandaranguwa. Ansha yandam tárangiya. Ashiriya, yuw tputs yutaritshishee patatkachu, anumand antaati wipsha tsipamaam wanindaja. Mishat, wipataati yutaritshishee patatkachu anumand waparsha tsipamaam wanindtamtaja. Yuwamari yutaritshishee patatarangu anumari tsipamaam waritariya, tárangiya. Ashirucha, anoo yasarangu, nda wipawaatsina pacharangiya.

⁷ Amasiyas kurak Salush tsap ichingaru 10 mil tputsee Edomshuchee pacharangiya. Anoo tsap Sela, misha Joktela atusin, yásamaranganaya. Ansha tsap sur na wandaritam taariya.

⁸ Anumunsha tsiyatssee kurakaam Jowasaam zanganirangiya, Jowakasaam wipa Jehúwaam wachinllinu. Ansha kurak tsap Israelash taarangiya. Anoomsha Amasiyas kurak tsiyatssee zanganku, Naani ningeema. Neetsiri tasaseeruni tsipayani, tárangiya. ⁹ Ashiriya, kuraksha Jowas

uwsha tsiyatssee Amasiyasaam zanganku tárangeiya. ¿Antaati shiy tapazpa waritareezish? Mang sirútama yumbas tsiyatssee yanaam zanganku tárangeiya. Shiy iparish kiz nuwaam ipari kamuzaam panangi wizanlleema, mang tárangeiya. Itaru, pamarsha watar naatarangu, izuuru yumbsaa mang kapcharangiya. Nuwsha shiyaa ashimaam waritaktamta. ¹⁰ Nuw yasakina yuwa shiy Edomshuchee ashparit pacharangish anootsi. Yuw ashirangish an wanasisrinaa wanasisircha. Itaru, shiy anumand shaanaatsi kizpureem ínaksha. ¿Mayaamsha shiy nuwapa yachamaam zandaksha? Papcha, tsiparush. Nda ashimaam, pangishiritish mapiyrush taangcha. Ndunnaa ashkush, shaanaatsi kapung tayutaritamaam taariya. ¿Mayaamsha Utaáchchee ashchiri tayutaritamaam zandaksha? tárangeiya.

¹¹ Tárangitaa, itaru Amasiyassha kurakaa kuk nda payurangiya. Ashirucha, Jowassha ashpariwasundururee Amasiyaspa waratamaam tushaneerangiya. Ashirangu, tsap sur Bet-semesash Utaásh watsapuni pachamaam shaniyaranganaya. ¹² Ashirangsin, Israelchichsha kurak Utaáchchee zapan pacharangu, wamari kasirangiya. Utaáchich sundar kizpur puniksin, zapan waanpeetam pangup suwasuwaranganaya. ¹³ Ashirangsin, anush tsap Bet-semesish Utaáchchee kurak Amasiyassa putayarandsin, waptam watsapunip Irusarinap machtarangusin, Irusarinush kuseersin, yaktashsha watandpun 180 metor kapeetarangiya. Efrayinimand washitungashi yáyaru, yuwamunari washitun-

gashi watandpunoo tutsiparatu ashchiri wazuranirini kapeetarangiya. ¹⁴ Ashirangsin, ichingaru maachta oroo, misha kurikeetsitam waamatarisha itutsiranganaya. Mishat, yuwaatstam oroo kurik Apanllish pang' maachi zapan wayakana, anoo waamataritam yarangiya. Ashirangu, anumun ashpatam tputsee undararee putambeerandsin, waanpeesha yaktarin Samariyap machtaranganaya.

¹⁵ Ashiriya, nee tsiyatsis arangeem yasamaam zandkus, kurakaa Jowasa taárash, misha yuwaatsitam Amasiyas Utaáchich kurak waratarangana anoo yasamaam zandkus, yandam taariya, yuwashutam ichingaroo kurak Israelchichee kamanku anshutamta. ¹⁶ Ashiriya, kurak Jowas tsiparangu, yaktash Samariyash mapuranganaya, yuwashtam kurakawaa Israelchichee mapurangana anshutamta. Ashirangu, anumun wipsha Jerobowamsha kurakaam kinarangiya.

¹⁷ Amasiyasanaa Jowas wip Utaáchich kurak wandari taarangiya. Yuwamun kurak Jowas, Jowakas wip Israelchich tsiparangu, anumun ¹⁵ masach taarangiya. ¹⁸ Ashiriya, Amasiyasaa taárash arang yasamaam zandkus, yandam kirak Krónikash taariya, yuwash ichingaroo Utaáchchee kuraka kamanku anshu. ¹⁹ Ashiriya, Irusarinashsha yakat Amasiyasaa parangusin, tputs zapan pachamaam tsiyataranganaya. Ashirangsin, anoo Amasiyas mazinarangu, yakat Lakisap suwarangiya. Itaru ashiritaa, sundarsha ambiri tachiteerandsin, kamateersin pacharanganaya. ²⁰ Ashiriya, pacharangusin,

tsiparee kapaachumun ush wayayarandsin, Irusarinpitam yakat yátaranganaya. Yuwashutam zitaminarinee Dapiyarineetsi mapurangana anshutam mapuranganaya. ²¹ Ashirangsin, Utaáchich ichingarusin tputs shaniyarangsin, wipaatssha Asariyasaatssha kurakaam ínaranganaya. Waparish uwsha zamurangiyi. Asariyas masachirini 16 taarangiyi.

Ashiriya, na kamaneena yuwaa kurak Amasiyas tsiparangu, wipsha Asariyas kurakaam kinarangu anootsi.

18

Ashiriya, na kamanchintspa yuwaa yaktaa Samariya kapeetarangana anootsi

⁹ Yuwash Esikiyas ipunpunar masach Utaáchcheem kurak kinaru taachu, anush Asiriyashuchsha kurak Salmanasarsha, Pachani atusin, Samariyah yakat kusarangsin, taturpiranganaya. Yuwapuritam kurak Israelshuch Ela wip Osiyas, tsimbun matayaru masach urutari kurakaam kinaru taaru anpur Samariyaa taturpiranganaya. ¹⁰ Taturpirangusin, tuchip masach anshuri kachingaranganaya. Ashirangsin, undarar Salmanasar Samariyshuchee izuuru kasiranganaya. Yuwapur Esikiyas 6 mashach kurakaam taarangu anpuru, misha yuwapurtatam Osiyas 9 masach kurakaam kinaru taarangu, anpuritam Samariyshuchee yaktarini kasiranganaya. ¹¹ Ashiriya, kurak Asiriyashuch Israelchichee wamaritssin kasirangusin, Israelshuchee tputs putayarandsin,

Asiriyapsha tsap machtaranganaya. Jalajash tsap Jaborumun kung wing wayaranganaya, Ngusanumunatam wingu Medosshuchish tsapu. ¹² Ashirangana an nda mangutari ashiranganaya. Yuwamand Israelchich Apanlee wamachtash kapeetarangsin, apanllputsingazimarisha zandarangsin, Apanlee kuk Móysisarini yandarangu anoo nda payurangana, anumand Apanllsha waneerangu, kiyung kachiykusin taaranganaya.

Ashiriya, na kamaneena yuwaayakat Samariya tputssha watsapuneem amuytarangu anootsi.

*Ashiriya, na kamanchintspa yuwaay
Asiriyashuch kurak tsiyatssee Utaáchcheem
kamanirangana anootsi*

¹³ Esikiyas 14 masach kurakaam kinaru taachu, anush Asiriyashush kurak Sinakirip sur Utaáshchee pacharangusin, yakat kámanamaatstaa, wamaritin kasiranganaya. ¹⁴ Esikiysha Utaáchich kurak tsiyatssee Lakisap yakat Sinakiripaam Asiriyshcheem kurak zanganirangiya. Nuw mantsiri chinaranguri, shiyaa kapeetamaam zandarangina. Itaru, nuw shiyaa wanasis tuwapchinllpa. Ashiriya, na in shiy nuwaa tsapuni kasayarush shtungangcha. ¿Wanipamasaja zandaksha yuwanmand shitungachish anumandaya? Ashiriya, nuwsha ashparitam tuwapachinllpa, tárange. Ashiriya, Asiriyashuch kurak anoo mazinarangu, mangutarisha arang tuwapapanda átu, kamachtarangiya.

9,900 kilo kurik mburshimash, anumunsha oroonandari 990 kilo aship

nuwaam panangandama, tárangiya.

¹⁵ Kuraksha Esikiyas ashparitam tatsamooru panarangiya. Ashiriya, anoom tuwapamaam kurikee Apanllish pang' yarangu, misha kurikee pshtashishtam yáyaru, ashpari panarangiya. ¹⁶ Mishat, Apanlleem pang' wach shtandashee yusheeru, oroo taparama ktazeeyaru, kurakaamsha panarangiya. Yuwaa waana shitungasheem wanasis orpa wayarangu anoo panarangiya. ¹⁷ Ashirangu, kurak Asiriyashuch Sinakirip waanaatsi wipunashee Utaáchchip kurak zanganirangiya. Mishat, sundarutam kizpureew sundarpatatin pachamaam zanganirangtamta. Ashirangsin, tsap Lakisash shaniyarangsin, Irusarinapsha yakat naataranganaya. Ashiriya, Irusarinash kusarangsin, mus tashtap taaru annung ngoots chirikoo káchampaneem wayarangana, annungiri ashpartin shaniyaranganaya. ¹⁸ Sheersin, Esikiyasaa Utaáchchee kurak, Eliyakimaatstam Hilkiyasa wipa kurakaa pang' ksutamapanee, Sebnaatstam kirakaa yandampanee, Jowaatstam Asafa wipa kurak wipunashi kuruzeeru, uwshtisin tsiyatamaam yaktamun watandpunu kárirangana, watam anin kurakawanandari taaranganawa. Itaru, Esikiyasanaa pangshuri kutarangiya. ¹⁹ Tandapunizimun káreersin, nap ashkusin, Asiriyashuchsha kurak wipunash tsiyatarangiya. Tsiyatssee kizpur tpuxtamashee tsiyatarangiya. Uwshat, Ashiriya, kurakaa Esikiya kamaningtsa, yuw nuw kurakari kizpur Asiriyashuch kamachtarangu anootsi. ¿Tamasha mangishish táchakush, nuw ichingaroo

maachi nuwamari kasimaam waritatana átsha?
²⁰ Na mangish chinangcha. ¿Antaati yuw tputs wanasiritaatsiri tsiyatku, an wamari tapazpa kasimaam waritatar? Ashiriya, ¿chakamunsha mangis tatkus, iyaa kapeetamaam zandaksha?
²¹ Siy Ijiptoshchimun tputs mangis tatuksa. Itaru, an tamapingampancha. Chinganamun pátangammun chaana katkuch, chiyaatssha kapchiya. ¿Chakaja anumun mang' tatuch? Ijiptoshuch tputs ashikpaz ashiriya, anumun mangis tatintspa. ²² Mishat, siy tsiyatkus, iy Apanllimuncha mangini tatkini atinaareesa, itaru ¿wanip Esikiyas Apanlee ungirtamaam kapeetaranga? Anoo ungirtamaam watsta. Itaru, Irusarinush ungirtakana anootsimari ungirtangtsa, tárangewa. ²³ Amb ashirangus, siy na wizpuriris ndunarshita.

Ashiriya, nuwapa kurakari, Asiriyashuchpa kurak yachayani. Nuwsha siyaam kapaach 2 mil panachintspa. ¿Kamaparee shiy ashparitam kapaachpanee tputs pangachsha? Itaru, pakchitaateesha, ¿antaati shiy Asiriyashuchee nlluraatstaa tusuwacheezis? Nda. ¿Antaati Ijiptoshuch siyaam kapaachoo istaku istacheeja? Nduni. ²⁴ Mishat, ¿mayaamsha siy Ijiptoshcheem kutakus, Ijiptoshuchpari iyaam tapazpaneem kapaachoo panachinllinaya átus, anumunari mangis tatuksa? ¿Antaati anpataja iyashchee sundar puxtachis? ndambaree. ²⁵ Mishat, ¿antaatiya iy msangareezi nish tsap siyaam pachakatuni kusarangee? Apanll waana iya kamachtarangiya, nee tsap kapeetamaama, tárangeya. ²⁶ Kuraksha Esikiyas wipunash,

Eliyakimsha, Na mazinanganlla. Shiy Aramewshuch k'kuz tsiyatangasindama. Hebrewshuchinaa kuk watsta, watam siy Hebrewshuchish k'kuz tsiyatkachush, tputs ichingarusin tandapunuzimun xiyarsin, siyaa mazinakanawa, tárangeya. ²⁷ Sundarshitisin urkar, Iyaana kurakari Asiriyashuch kamachtarangu, yuw tputs wishchip shaneerana anootstam ichingaroo kamaningcha, tárangeya. ¿Antaati nuw siyaatsimtaja kamankee? nduni. Ndunnaa nuwaa kuki mazinakus, siysa ichingarus marizimun kiyung kachiyatssa. Ashkachus, uru siy chheetstamtis katungatssa. Mishat, sachitkus, kuseetstamtis waatssa, tárangeya. ²⁸ Táyaru, Asiriyashuch sundar xiyeeru, Hebrewshuchish k'kuz tsiyatku, kapung tsiyatarangiya. Asiriyashuch kurak átu, anoo mazinangtsa. ²⁹ Esikiyasaa kuk payurintspa. Siyaa tamapingayantspa. ¿Tamareeja nuwaa kasiyaru, siyaa tapachindayach? ³⁰ Mangu ngichku, siyaa, Apanlimun mangini taateeni. Ashkachuch, uwsha iyaa tapachindachiya. Asiriyashuch kurak chiyaa ndusha kasichiya, kurak átcha. ³¹ Atitaatiya, itaru siysa anoo kuk payurintspa. Itaru, nuw tsiyatki anootsimari k'keetsi payungasindama. Nuwapa kurakari tatsuyayarus, uru kissha taatssa. Saantarisha kizarunaa tatsumeerus, misha kinduratam, mishat saamataritam waasheemis kungureemis payutssa. ³² Amb ashkachuri, siyaa ashparitaatssis iyaanpeesha macheeruri, nish tsap taakis ashimatam taatssa. Yuwash tirikutam, misha kizarunatam, olivotam zapan

taaru, anush siyaa wayachintspa. Ashkachuri, siy ndushat kiyung kachiyatssa. Mishat, ndusha tsipatssa. Itaru, Esikiyasaa kuk payurintspa, yuwaa mangu siyaa ngichku, Apanllpari iyaa taarasheetsini tapachindachiya átu anootsi.

³³ ¿Na tamarimta? Minpitch apanllputsirimun mang' taturangsin, iyaa tapachindachpari, tárangusin, ¿apanllputsirini tapachindarang? ¿yuwaa iyashuch kurak Asiriyashuch waratarangana anootsee?

³⁴ ¿Na yapeewamta apanllputs Hamat misha Arpad? Mishat, ¿yapinaaree apanllputs Sefarpayim, misha Jenása, misha Iba? Napangi, ¿an tamarangimsinaya? ¿Antaati waanaatsi yaktarini waanpata wizpurirni Samariya Asiriyashuch waratarangana anoo tapachindarang?

³⁵ ¿Tamamsha nish apanllputs waanaatsi yaktarini tapachindaranga, watsapuneetsee yuwaa kurak Asiriyashuch waratarangana anootsee? ¿Mayaamsha mangutish mangishish chinakus, Irusarinaa yakat Apanllpari tapachindachiya átssa? tárangeiya.

³⁶ Ashiriya, tárange anoo tputsshitisin Utaáchich ichingarusin nda tsiyatkusin, mazinarutar ashiranganaya. Nda minumtiyam tsiyatsis tsiyataranganaya. Watam kurak Utaáchich Esikiyas, Minumtiyam siy yuwaa tsiyatkachu anoo yámeerus tsiyatintspa, tárangewa.

³⁷ Ashiriya, yuwaa tárange anoo Eliyakim kurakaa Utaáchchee pang' ksutamapan, misha Sebnaa kirakaa yandampan, misha Jowas kurak wipunash anin mazinarangusin, kizpur mang' mantsaksin, wamaree izichiranganaya. Ashirangsin, kurakapsha Esikiyasap tsiyatssee kamankatssin

naataranganaya. Anushsha kuseersin, ichingaru yuwa mazinarangana, anoo kamaniranganaya.

Ashiriya, na kamaneena yuwa kurak Asiriyashuch wasundururee zanganirangu, uwshtisin tsiyatssee Utaáchcheem kamanirangana anootsi.

19

Ashiriya, na kamanchintspa yuwa Apanll Utaáchchee tapachindarangu anootsi

¹ Kuraksha Esikiyas yuwa sundar tsiyatarangu anoo mazinarangu, wamarree izichirangiya. Wamar purussha kamartarangiya. Sheeranllu, Apanllipsha pang' naatarangiya. ² Sheeru, pangoo ksutamapaneetssha Eliyakimaa, mishat kirakaa yandampani Sebnaa, Kamaris mantsirimash kamartayarus, Isáysapsha Apanllee kuk kamanimapanip, Amosap wip napashingtsa, tárange, naataranganaya. Isáysash kuseersin, ³ kurak Esikiyas ateeja, Na in zar iy kizpur mangini mantsakuni, kiz nlluraa tatsipku wizpur ndunartaru, iysha ashikpaz ashirangtamani, na wizpurini ndunarshita. Tsiyatssee mantsirimash mazinaranguni, kizpur kiyung kachiykiniya. ⁴ Yuwa Asiriyashuch sundar urkar mantsir Apanllee tsiyatarangu, anoo Apanll yasarangpari. Apanll anumand waana uru wanichpari. Ashiriya, na in shiysa iyaam Utaáchcheemani machinaw katuchimini taakini anoomani Apanllpa mashangcha, iyaan tapachindamaama, tárange. ⁵⁻⁶ Isáyassha, Siyat kurakaa kamanishinints. Apanll ateeja. Asiriyashchee kurak kuk punirintspa, watam

mangutari nuwaa tayutaritaranganawa.

⁷ Mazinangtsa. Nat in tsiyatssee mazinakchu, punirustachu, waptam watsapunip mikeeru kanapchinllinaya. Anush kuskachu, tputsha pachachiya, Apanll kamanku átcha, tárangiya.

⁸ Ashirucha, Asiriyashuchsha sundar urkar tsiyatssee mazinarangu, Asiriyashuch urkar Sinakirip Lakisap káyaranllu, yaktap Libnap pachakatu naayaranllu, mang tárangusin, puniku, naatarangiya. Libnash kuseeru, yuwaat tputspa pachakaktarana anoo parangiya.

⁹ Anush pachaksin, tsiyatsis min kusarangiya. Papcha. Tirjaka Etiyopshuch kurakaaw wasundururee zapan tushaneerangiya, shiyapa waratamaama, mang tárangiya. Ashirucha, anoo mazinarangu, yusur tsiyatssee kurakaam Esikiyaam zanganirangiya.

¹⁰ Uwshtisin tsiyatssipan Irusarinush kuseersin, tsiyatkusin, ¿Antaati shiy Apanlimun mangish tatkish an Irusarinaa yakat tapachindacheeja? Mangutish Apanlimun mangish chinarinllpa, watam shiyyaa mangutari tamapingakuwa.

¹¹ ¡Waasha nda yasarangish! Sirútamasa Asiriyashuch kurak ichingaroo tsapuranas waamari kasirangu, ¿ashiri natsha ambitam ashkachu, shiyhat kamungcheezish?

¹² Ashirangsin, ¿tamarimta apanllirini waanaatstisin tapachindarang? ¿Yuwaa yashuch ichingaroo tputs pacharangu, Ngusanshuchee, misha Aramshuchetstam, misha Resefshuchetstam, misha tputs ichingaroo Bet-edenshuchetstam tsap Telasarash taarangana anoo ashparita pacharangana

anootsi? ¹³ ¿Na yapeewamta kurak Hamat, misha Arpad, misha Sefarpayim, misha Jená, misha Iwá, na yapimsiniya? Anoo ichingaroo pacharanganaya, tárangiy. ¹⁴ Kuraksha Esikiyas kirak yandama, Asiriyashuch kurak zanganeeru, anoo yarangu natstarangiy. Sheeru, Apanllipsha pang' pshtuyaru, kirakaa íwar imangeeru Apanllpa masharangiya. ¹⁵ Apaa, shiy kizpurtishcha. Shaanamuntari kuxinshish kuxinaksha. Sundarurish turipingarana, anush kuxineerush, shiyamari maachtaa ichingaroo, kurakaatsitam tsapurunasshuchee wayarangsha. Mishat, shiyamari kanindaa, misha tsapootsitam tinarangsha. ¹⁶ Ashiriya, Apaa, nuwaa kuki mazinangcha. Napancha, ¿Na tamakanaya? Sinakirip tsiyatssee zanganirangu, shiyaa kapung tayutaritarangiy. Shiyyaa Taarashipaneetstaatish, ashiritaa shiyaa mantsir tsiyatarangiy. ¹⁷ Zuramana, zurkanaya, Apaa; kurak Asiriyashuch ichingaroo tsapuranas waratarangsin, waamaritin kasirangusin, wat-sapuneetssin ichingaroo tayutaritaranganaya. ¹⁸ Ashirangsin, apanllputsirineetsi ichingaroo tirooranganaya. Itaru, an Apanlleja. Mangutari yasina, mishat patumbcheetstam tputs uwpatari tinarangana. Ashirucha, ashimatseeru wamari kasiranganaya. ¹⁹ Itaru, Apaa, shiynaa kizpurtishcha. ¿Chaka shiyaa kasich? Ashiriya, iyaa kasimaam zandkusin, shiysha iyaa tapachindangcha. Ashkachush, shiyaa ichingarusin tsapurunasshuch yasachinllinaya. Shiy minumaritishcha Apanllish, Esikiyas tárangiy. ²⁰ Táyaru, Isáyassha tsiyatssee

Esikiyasaam zanganeerangya. In watacha Apanll waana tsiyatarangu, Nuw Israelchichee kapung chinakina. Yuwaa shiy nuwaa masharangish, anoo nuw mazinarangina. Asiriyashuch kurak Sinakirip tputsee kiyung yachaku anoo ichingaru yasakina. ²¹ Waana Apanll Sinakiripaa ateeja.

Irusarinshuch kiz kamasin tamaparee ashirusin shiyaa kis stachinllinaya, misha sundarureetstamtish.

Shiy tsapunpish kanapkachush, kizpur ka ka táchinllinaya.

²² ¿Chakaa shiy tayutaritarangsha?

¿Chakaa kapung yutaritaam ínarangsha?

¿Chakpa tsiyatarangush, shaanaatsi kapung ungirtarangsha?

¿Ndusha Apanllee wanasisimshee Israelaa chinarrangu anoo tayutaritarangish?

²³ Shiy tsiyatssee zanganirangush, sundarurishish Apanllee kapung tayutaritarangsha.

Anushsha tsiyatkush tárangsha.

¿Chakaja nuwapa waritach?

Nuwapat tputsiri tapazpanpat, misha kapaachpa pshiyshirini yap tsap tspakatu amb pachakaturi naayaranlluri, nuwamari kasirangina.

Libanumun mach káreeruri, anush karipanaa washitannandari katsparangina.

Mzatspaz ashiru kizpur wanasi paranguri, anootssha nuwaamatari yarangina.

24 Anumunsha arang minup tsap nllitaritash
kusaranguri, kungoom ktseeyaruri, anoo
waarangina.

Mishat, ktsipashti Ijiptoshchee kung kátiranguri,
izuuru puzarangiya.

Nuwnaa xapoomaam wanindaja, tárangsha.

25 Itaru, shiy nda nuwaa yasakish.

Nuw minumaritana Apanlli.

Nuw maacheetsi ichingaroo wayarangi antana.

Sirútamasari nuw shiyaa ipusarangina.

Itaru, na in zar tatsamooru shitungarangsha.

Ashirucha, na in shiy tputsee yakat
kámanamawaatstaa,
ashpirit kapeeteerush, kasakchush, maachtamar-
isha anush karut kxunatangat ashtachiya.

26 Kurakaw tputs kizpureew taarangtaatssin,
shiyaa pakchusin, kapung pazichinllinaya.

Kizpuritam puniranganaya.

Sirú waanaatsi ungirtarangusin, chirichir
wanasir kxuntaru ashirangtaatssin,
an tputs mangutarisha chirichiree puzash tat-
sumeeruch, tsipataru ashtachiya.

Kambusursha yap zar yaku amb kuskachu, ash-
parita tpachingchiya.

27 Nuw shiyaa yasaktana.

Shiy yapimasaja xiyksha, misha mayaatsimasa
chinaksha, anuwaa ichingaru yasakina.

Shiy kizpur tsiyantarangush, nuwaa mantsir tsiy-
atarangush, anootstam yasakina.

28 Ashiriya, yuwamand nuwaa mantsir
tsiyatarangish anumand nuwsha tas
mbammash shipimunish tunashuruchima.

Mishat, ngusamb tayurmim k'kishish tutsachima.

Ashiramchuri, wapitam tsapunpitamtish nuw shiyyaa pshiyrchinllpa, Apanll shiyyaa Sinakiripaa,

átcha, Isáyas tárangiya. ²⁹ Mishat, Isáyas kuraka Esikiyasa tsiyatku tárangiya.

Nimun Apanllee kuk zurampatari yasachsha.
In masach yuw tirik waanitari wach pantsayaru, kxuneeru, yusiyku, anootsimari katungamaam waritariya.

Itaru, tatsumaatssha tuchparini masach tushiyramchu, anush katungamaam waritariya.

Anshunaa mapiyshtis ichingaru wanus pusayarus, kizarunaa katungamaam waritachiya.

³⁰ Ashiriya, yuwshtisin Utaáchich wandari katuchim taakana, anshitisin yasin tamapari ashirusin, kxuneersin, xixpurtayarusin, wanuseemsha yusiychinllinaya.

³¹ Anumunsha, nuw Irusarinshuchee tputs katuchimawaa istachima.

An tputs ichingarusin tsap Siyonashsha taachinlinaya.

Anush nuw wayachintspa, atiya Apanll kchinnamshi.

³² Itaru, kurak Asiriyashuchetssha Apanll atiya. ¿Antaatiya yakat Irusarinash pshtuchazinllinaja? Anush kuseersin, minumtiyam timbanllizpa tsak ashtachazinllinaja.

Minumtiyam sundar xanxapshipa waanaatsi kámanayarusin, tputseetssha pachachazinllinaja.

Yaktaa watandpun kárimaam káringshee wayac-hazinllinaja, ndambaree.

³³ Urupa anumandari xarayarusin, paziksin, wapitam kanapchinllina.

Watam anush yakat pshtumaam pinasawa.

Nuw Apanlleeruri siyaa itsinsari kamankina.

³⁴ Nuw anoo yakat tapachindachima, yuwamand sirútama zitaminarinpa Dapiyarinpa kizpur chinarangi, anumanda.

Piy ashkachuri, tputs ichingarusin, nuwaa yasachinllinaya,

tárangiya.

³⁵ Táyanlllu, natam psaan Apanllsha wasundurur naatarangu, yuwash Asiriyashuch sundar shaneerana anush kuseeru, tputsee 185 mil sundaroo pacharangiya. Putamsha ashparitin tsiparshitisin taraseeranganaya. ³⁶ Ashirucha, Asiriyashuchsha kurak Sinakirip anuritam watamburee tapureersin, waptam tsap Ninipipsha naatarangiya. ³⁷ Ambsha naatarangu, apanllirineetssha ungirtapi átu, apanllputshish pang' pshturangiya. Anush apanllputsee Nisroka ungirtaku, wipsha tsimbunari, Adramalek, misha Sareser ashirusin kusaranganaya. Anshat waparish kusateersin, kuraka pacharanganaya. Sheerandsin, tsap Araratap suwaranganaya. Sheeru, anumun wipsha Esarjadom kurakaam kinarangiya.

Ashiriya, na kamaneena yuwaan Apanll Irusari-naa yakat tapachindarangu anootsi.

22

*Ashiriya, na kamanchintspa yuwaa Osiyas
Utaásh kurakaam kinarangu anootsi*

¹ Ashiriya, Osiyas nllurari masachirini 8 taaru, anush kurakaam ínaranganaya. Kurakaam kinarangu, Irusarinash washunand 31 masach taarangiya. Wanir sur Jedida, Adayasarini wipa. Ansha kiz Boskatshuchimuna. ² Osiyas kurakaam kinarangu, kizpur Apanllee kuk payurangiyi. Sirútama zitamarini Dapiyarini Apanllee kuk payurangu, uwshat ashirangitamta. Apanllee kuk wanasis tatsamooru payurangiyi; nda pakchiyam kapeetarangiyi.

Ashiriya, na kamaneena yuwaa Osiyas wanasis taarangu anootsi.

*Ashiriya, na kamanchintspa yuwaa Apanllee
wirkar kamachtamarini Apanllish pang'
yarangana anootsi*

³ Kurak Osiyas 18 masach kurakaam kinaru taachu, anush Safanaa Apanllip pang' zanganirangiyi. Safan kirakaa yandampanimuncha, Asariyas wipa, Masulama wachinllinu. ⁴ Osiyassha, apanllpanip urkar Hilkiyasap tsiyatssee kamanishini. Shiy Hilkiyasaa, anush Apanllish pang' kurik taaru anoo yáyarush, Apanlleem pang' yaramapaneeem panangcha. Mishat, yuw tputs pshtumaam tuwaparangana anooststam yáyarush panangtamcha, ⁵ anpa kurik Apanlleem pang' yaramaama, yuwaam tputs Apanlleem pang' tarawaztakana anoom tuwapamaama,

⁶ misha yuwaamtam tputs táwara wanasisipich-taku anoomtam tuwapamaama,

misha pangupaneemtam tuwapamaama,

mishat karipanaatstam paxanxamaama,

mishat patumbcheetstam paxanxamaama.

⁷ Amb ashkush, nuw nda shiyaa kurikimand tamundachinllpa. Kurikpatari tuwapakush, ¿mayaamaja kirakaa yámmandanda, táchée? Watam shiy wanasis chinakush, nda shuchikshawa. Nuw shiyaa mapiykina, átcha, tángcha, kurak tárangiyi.

⁸ Ashiriya, Safansha Hilkiyasap kamankatu, naatarangiyi. Anush kuseeru, apanllpansha urkar Hilkiyas Safanaa tárangiyi. Apanlleem pang' tarawaztakuni, nee kirakaa Apanlee kamachtamarini yuwa Móysisarini yandarangu anoo parangtanicha. Watatcha in kiraka, tárang, Safanaam panarangiyi. Safansha kirakaa yáyaru, ashchiri natstarangiyi. ⁹ Anoo kiraka natstarangu, kurakaa Oseyasa kamanirangiyi.

Apanllish pang' ichingaru kurik taarangu anoo yáyarusin, anootssha kchayashtisin, kurik mbammashem tinayarusin, yuwaamsha tputs pangukana anoomshat tuwaparanganaya.

¹⁰ Apanlleem pang' tarawaztaksin, anush Móysisirinee wirkaree parangana. An neewa. In watacha, Oseyasaa tárang, Safan anoo kirak natstarangiyi. ¹¹ Ashiriya, anootssha Osiyas Apanlee kamachtamarini mazinarangu, kizpur mang' mantsaku, wamaree putayaru izichirangiyi. ¹² Ashiriya, anuritam Hilkiyasa,

misha Ahikama Safanarinee wip, mishat Mikaysarinee wip Akbora, misha yandampanee

Safana, mishat Asayasa kuraka wipunash ashpari kamachtarangiya. ¹³ Naturi naayarus, Apanllpa mashangints nuwaama, misha tsapuneemtamani, misha Utaáchcheema. Ashiriya, ichingaru Apanllpa mashantsa yuwaari kirak átu anurita. Na in Apanll iyapa kizpur tsiyantakpari, watam sirútama iy zitaminarani nee nda tuminuranganawa, táragu, ¹⁴ uwshtisin ashpisin Huldap Salumap wizanll pakatssin, naataranganaya. Hulda Apanllee kuk kamanimapani taarangiya. Saluma Tikbarini wipa, Jarjasarini wachinlinu. Salum apanllpanee wamari ichingaroo Apanllish pang' taarangu, anoo ksutarangiya. An Hulda Irusarinash taarangiya. Itaru, minungichich watandaram yakat taarangiya. ¹⁵ Huldash kuseersin, anoo kamanirangsin, uwsha kizsha, Nuw siyaa itsinsaru Apanllee kuk kamanchintspa. Apanll Israelchichee kizpur chinakiya. Ashiriya, kuraka kamanincha. ¹⁶ Apanll ateeja. Nuw Apanlltana. Nuw anush tsap kuseeruri, tayutariteeruri, kasachima. Yuwari kirakash kamanku anuritam ashtachima. Ichingaroo Utaáchchee tputs kiyung yachachima. ¹⁷ Watam nuwaa kuki kasaranganawa. Ashirangsin, minootsshhat apanllputseem kzammashhee mucheersin ungirtaranganaya. Anumand nuw kapung tsiyantarangina. ¿Antaatiya anoo tputs tsiyantakachuri, tsiyani ayamtaatiya pastacheeja? ¹⁸ Mishat, siysa Utaáchchee kurak kamaningtsa. Apanll ateeja. Yuwamand shiy nuwaa kuki payurangish anumand shiy mapiyrush tsipachsha. ¹⁹ Shiy

nuwaa kuki mazinarangush, kapung mangish mantsarangsha. Kamareetsish izicharangush, tanurangush, nuwaa masharangsha. Shiy nuwaa kuki tuminumaam zandarangsha. Itaru, Utaáchchee zurampatari tayutariteeruri, wanichima, Apanll shiyaa átcha. ²⁰ Nuw Apanlltana. Nuw shiyaatsinaa wanasir wayachinllpa. Shiy ndushapari kiyung kachiyachsha. Mapiyrush tsipakchush, zitaminap naatsha. Ndatuma yutaritshishee parush, ndaturi Utaáchich tputs kiyung kachiyarusin, shiyma tsipachsha. Ashiramchush, anumunaapari kushimunish yutaritshish kuschiya, Apanll átcha, Hulda Oseyasaa tárangeiya. Ashiriya, tárange anoo mazinarangusin, an yusur kurakap wapitam kanapuranganaya; Apanlee kuk kamankatssina.

Ashiriya, na kamaneena yuwaa Apanlee wirkar kamachtamarini Apanllish pang' yarangana anootsi.

23

Na kamanchintspa yuwaa kurak Osiyas Apanlleetsimarisha kuk payumaam Apanllpa masha-rangu anootsi

¹ Yusur kurakash kusarangsin, kurakaa Oseyasa kamanirangsin, kuraksha ichingaroo tputs kuruzurangiya. ² Ashirangu, ichingarusin Utaáchich wachinanur tputs, mishat Irusarin-shuchtam ichingarusin, apanllpaneewtamsin, Apanlee kuk kamanipaneewtamsin, ichingarusin tputs shaniyamaam Apanllish pang' pshturanganaya. Kuraksha anush

kirakaa yáyaru, yuwaa Apanllee kuk yandamaa Apanllish pang' yarangana anoo natstarangiya.

3 Natstam iwatsparamchu, kurak apusanand pangusee wanupish xiyeeru, Apanllpa tsiyatarangiya. Apaa, natunaa nimun shiyyaa kukish izuurashapari payuchiniya. Shiyyaa kamachtamarish tatsamooru tuminchiniya, tárangu, tputsshitisin ichingarusin zamangarangusin, Na nimun anootsimarissha tsiyatsis payumaam chinachiniya, tárangusin, anootsimarissha payuranganaya.

Ashiriya, na kamaneena yuwaa kurak Apanlleetsimarissha kuk payumaam Apanllpa masha-rangu anootsi.

Ashiriya, na kamanchintspa yuwaa kurak Osiyas wasundururee, apanllputsee kapeetamaam kamachtarangu anootsi

4 Ashiriya, kurak Osiyas Hilkiyasaa, apanllpanee urkari, misha apanllpaneetstam, misha Apanllee pang' ksutamapaneteetstam kamachtarangiya. Yuw Apanllish pang' apanllputsee ungirtamaam Baalaa, misha Aseraatstam, misha tsangacheetstam wani ashiru wayarangana, anoo ichingaru yáyarus, ishitungangints, tárangiya. Uwshtisin ashpari wishchip ishitungayarusin, Sedronaa* timburanlliz apusanand xanateersin, ashpari muchiranganaya. Sheersin, puzacheetsimarissha Betelap yátaranganaya. **5** Ashirangsin, yuwaatstam Utaáchich apanllputsee urkar ksutamapanee wayarangana anootstam tputs

* **23:4** Wanga 18.1 tsiyatsis nipta tatsamooru taaritamta.

kaapeetaranganaya. Watam uwin machimun íwar kzammashée ichingaru zar muchtaranawa. Anush machimun maacheetsi muchimaam ínarangana, anoo ichingaroo kaapeetaranganaya. Utaáchchish watsapun shuneeru, apanllputsee anoo ichingaru kaapeetaranganaya. Mishat, Irusarinash chapunguw taarangu, anootsitam ichingaru kaapeetarangtamsinaya. Apanllputsee ksutamapan kzammashée mbutarangana anoo izuuru kaapeetarangtamanaya. Mishat, Baalaam ungirtamaam zar ashiru, misha tsup ashiritam tinarangana anoo, ⁶ mishat Aseraamtam Apanllshuri pang' ungirtamaam tinarangana, anoo ichingaru yusheersin, kungumun wing xanateersin, ashpari muchiranganaya. Puzachimarisha katuchirangiya. Ashiriya, puzachee yáyarusin, tsiparish mapshishish kuruteersin, kasaranganaya. ⁷ Mishat, yuwaan apanllputseem ungirtamaama atusin pangurangusin, itaru anushsha tputs kamuzpatatin tayutaritarangana, anootstam pangus kaapeetaranganaya. Apanllshuri pang' ashiranganaya. Mishat, kiz apanllputseem Aseraam wamar k'tatarana anootstam ichingaru kaapeetaranganaya.

⁸ Anumunsha kurak Osiyas ichingaroo apanllputspanee ipazarangiya. Ichingarus Irusarinash kusangtsa, tárange. Anush kuseersin, Osiy wasundurur yuwaan machimun íwar apanllputseem ungirtamaam wayarangana, anoo ichingaroo kaapeetaranganaya. Tsap Guebamand chtayaranllu, tsap Beersabamun tutsiparu, kaapeetaranganaya. Watam anush

kzammashée mbuttaritamsinawa. Mishat, Josueynung pangu, Utaáchich gobernadorinshini pshtushini watandaramap mbazinungich yashingoom wayarangana, anoo ashchiritam kapeetarangiya. ⁹ Itaru, apanllpansha íwar yuwamun mach pshkuru anumun apanllputseem wayarangana, anootsimsha ungirtarangusin, ndusha Irusarinap Apanlee ungirtamaam naaranganaya. Ashkusin, anshurisha pangaa yuwamshée nda tputtaru anoo wamkurpasha katungkusin, taaranganaya.

¹⁰ Ashiriya, kuraksha Osiyas anoo parangu, ichingaroo tayutaritarangiya. Yuwaa Ben-Jinomash tandsa apanllputseem maacheetsi muchimaam wayarangana, anoo ichingaru yáyaru, kapeetarangiya. Tputs wipaa kamuzaa, misha kizaatstam wayayarusin, apanllputsee Molokaa ungirtamaam muchirangana, anootstam kapeetarangiya, nda ayamtaatiyam yusur nlluraa muchimaama. ¹¹ Mishat, yuwaa Utaáchich kurak sirú kapaachoo pshiyrshinpá zareem ungirtamaam wayarangana, anootstam ichingaru kapeetarangiya. Ancha ichingaru Apanlinung washitungash Natán-melekanung ksutarangiya. Anuwaa yáyaru, sumaspat muchirangiya. ¹² Mishat, yuwaa kurakash Ajashash pangu íwar apanllputseem muchimaam wayarangu, anootstam kapeetarangitamta. Mishat, Manases Apanlinung pang' apanllputsee wayarangitamta, anoo ichingaru yáyarusin, machimand Sedronash wazaw kapeetaranganaya.

¹³ Mishat, yuwaa tputs arapich Irusarinamand

yap zar yaku amb apanllputseem kizpur mantsirimash wayarangu, anoo tayutaritarangu, kapeetarangtamta. Mishat, Irusarinaa charapungaru tuwash kurak Saramun apanllputsee Astartee wayarangu anoo, mishat Sidonshuch tputs apanllputtsirini Kemos, misha Mowabshuch apanllputtsirini Milkom taarangitamta, misha Amónshuchsha apanllputtsirini taarangitamta. ¹⁴ Anoo ichingaru yáyarusin, patumbchee misha yasinaatstam ungirtarangana, anoo ichingaru chuweeranganaya. Sheersin, anumunsha yuwash apanllputseem wayarangana, anush tputseetssha wanap yáyarusin, xanateersin kasaranganaya. ¹⁵ Mishat, apanllputsee Betelash tsap Jerobowam, Nabatarini wip tinarangu, yuwapa Israelchichee tayutaritarangu, anoo chuweeyarusin, tirooyarusin, kasaranganaya. Mishat, Aseraatstam anush wayarangana, anootsshhat apanllputsee sumaspa tazuyarusin, muchirangtamsinaya.

¹⁶ Ashirangu, kurak Osiyas kanapeeranllu, naantachu machimun iwaz apanllputseem ungirtamaam wayarangana, anush tsipareetssha zapan wayam taaru anoo parangiya. Anootsshhat wasundururee kamachtarangu, Natu, wanap ichingaru yángints. Yáyarus, nimun yuwamun apanllputseem maacheetsi muchimaam wayakana anumun wayangints, tárange, muchchurshitisin, Ayu atusin, ichingaroo wanapoo yáyarusin muchiranganaya. Amb ashirangu, Apanlee kamachtamarini yuwaa kurak kirakaa yáyaru, natstarangu mazinarangana, anooritam tatsamooranganganaya. ¹⁷ Ashirangsin,

tputseetssha masharangya. ¿Maya machimun taara? tárangu, tputsshitisin anshuchiri, Utaáchich Apanllee kuk kamanimapan mapurangana ancha. Nish kusarangu, yuwaa shiy Betelash tsap apanllputsee ichingaroo kapeetarangish, iyaa wasina kamanirangya ancha, táranganaya. ¹⁸ Ashiriya, kuraksha Osiyas wasunduraree, Watsta. Anoo tsipari ptatintspa. Minumtiyam tputs anoo patatamaam watsta, tárangya. Ashirucha, Apanllee kuk kamanipan yakat Samariyamand kusarangu, anshurisha tsiparangu, mapurangana, anuwaa nda tayutaritaranganaya.

¹⁹ Mishat, yakat Samariyash pangus íwar kapunguw apanllputseem pang' pangurangana. Yuw kurak Israelchich pangurangusin Apanllee kapung tatsiyuntarangana, anootssha kurak Osiyas ashchiri pangus kapeetarangiya. Apanllputsee Betelash yakat tamarangpari sheertam kasarangya. ²⁰ Ashirangu, anshuritam ichingaroo apanllputsee urkar pacharangu, yuwashutam apanllputseem ungirtamaam maacheetsi wayayarasin, muchtarana anumuntam tsiparee ashpari wayayaru, muchirangya. Ashirangu, kurak Osiyas yusur wapitam Irusarinap kanapurangya.

Ashiriya, na kamaneena yuwaa kurak Osiyas ichingaroo apanllputs kapeetarangu anootsi.

Ashiriya, na kamanchintspa yuwaa kurak Osiyas kapung shambatshisheem wayarangu anootsi

²¹ Kuraksha Osiyas ichingaroo anshuchee tputs kamachtarangiya, Apanlleem shambatshisheem wayamaama. Yuwaa Apanll iyaa Ijiptosh tsap tashitungarangu, anoo nda mbizamaam shambatshisheem wayayani, tárangya. Ashirangsin, yuwartatam Apanll kamachtamarini yandam taarangu, anuritam tatsamooru wayaranganaya.

²² Minumtiyam Israelchich ksutamapan nda amb ashiru ungirtatarusin, sirútamastaatiya zitamin kurak Israelchich Utaásh nda amb ashtarusin, wamari kurak Osiyas ashiru kizpur kapung shambatshisheem wayarangya. ²³ Osiyas kurakaam kinaru, 18 masach taachu, anush zar yakat Irusarinash shambatshishee kapung wayayaru, Apanllee ungirtaranganaya.

Ashiriya, na kamaneena yuwaa kurak Apanllee ungirtarangu anootsi.

Ashiriya, na kamanchintspa yuwaa kurak Osiyas apanllputsee kapeetarangtaa, wandari xarashish taarangu anootsi

²⁴ Kurak Osiyas ichingaroo apanllputsee kapeetarangiya. Mishat, wazuriretsitam, misha tuwachimapaneetstam, misha apanllputseem tputs pangshuw payukana, anoo ichingaroo kapeetarangiya. Mishat, yuwaatstam Utaásh maachtaw yashingchich mantsir tinamaw taarangu, misha Irusarinshutam taarangu anoo ichingaroo ashpari kapeetarangiya. Apanllee wirkar apanllpan Hilkiyas Apanllish pang' parangu anoo ichingaru tatsamoorangiya.

²⁵ Nda minumtiyam kurak ashim sirútamastaatiya taarangu, anumari kurak Apanllee mangpatari

chinarangiya. Apanllee zurampatari chinarangu, kamachtamarineetsi wanasir tuminuranginya. Móysisarini wirkar kamachtaku anuritam tatsamooru payuranginya. ²⁶ Itaru, ambitaa ashirangu, ichingaru tatsamoorangitaa, wandaritam Utaáchchée nda Apanll kis naparanginya. Yuwamand ichingarusin tputs Manaseschich Apanllee tayutaritarangana, anumand Apanllsha nda kis naparanginya. ²⁷ Ashirucha, Apanll Utaáchchée kasamaam zandaranginya. Israelaa tsap kasarangu, ambitam ashimaam zandaranginya. Sheeru, yaktaa Irusarina izuuru kapeetamaam chinarangiyi. Yuwaatsitaa waana Apanll ipusarangu, waama pang' pangurangana, anoootsitaa kapeetamaam zandaranginya.

Ashiriya, na kamaneena yuwaan Apanll Utaáchchée tputs nda kaapa kis naparangu anoootsi.

Ashiriya, na kamanchintspa yuwaan kurak Osiyas tsiparangu anoootsi

²⁸ Kurakaa Oseyasa taá rash yasamaam zandkus, misha yuwaatsitam taarangu anoo, misha yuwaatsitam tarawaztayaranllu anoootsitam yasamaam zandkus, kirak Krónikash taariya, yuwash ichingaru kurak Utaáchchée kamanku anshutamta. ²⁹ Yuwash waritarangu anush kurak Nékav Ijiptoshuch parawarini shitungeeru, kungup Eufratis naayaranllu, kurakaam Asiriyashcheem istaati týayaranllu, naataranginya. Ashiriya, kuraksha Osiyas tapazeem shitungeeranllu, anpasha

chamayangaranganaya. Itaru, kuraksha Nekav Meguidash tsap parangu, kuraka Oseyasa pacharanganaya. ³⁰ Ashirangsin, Oseyasarini wasundurur tsiparee Oseyasarinee kapaachush pshiyrshini wayayarandsin, wapitam watsapunip Irusarinap yátaranganaya. Yushindarangusin, anshurisha mapuranganaya. Sheersin, tputssha ichingarusin shaniyarangsin, wipaatssha Jowakasa kurakaam ínaranganaya. Waparinash zamurangiy.

Ashiriya, na kamaneena yuwa kurak Osiyas tsiparangu anootsi.

24

Ashiriya, na kamanchintspa yuwa Jowakim kurakaam kinarangu anootsi

⁸ Jowakas wipa, Jowakim masachirini 18 tatsamoothu anush kurakaam kinarangiy. Ashirangu, yakat Irusarinash tuchpamari tsup ksutarangiy. Wanirsha taarangiy sur Nehusta. Elnatan anoo kizaa wipamuna. Ansha kiz Irusarinshuchimuna. ⁹ Itaru, Jowakimsha kurakaam kinarangu, Apanllee kuk kapeetarangiy. Nda Apanllee kuk tatsamoorangiy. Waparin Apanllee kuk nda payurangu, uwsha ashirangtamta. ¹⁰ Anpursha zar Nabukodonosor Babiloniyshuch kurak wasundururee kamachtarangu, Irusarinap pachamaam naataranganaya. Anush kuseersin, taturpiranganaya. ¹¹ Anumunsha zapish kurak Nabukodonosor anshutam kusarangiy. ¹² Ashiriya, Jowakimsha kurak, misha

waniritam, misha wasundururitam, misha kurakawatamsin, misha wamkureewtamsin ichingarusin kapung puniksin, kamiyarangusin, Babiloniyshuch ichingaroo putaranganaya. Yuwapur Nabukodonosor 8 masach kurakaam kinaru taachu, anush kurakaa Jowakasa putarangiya. ¹³ Ashirangsin, Nabukodonosor ichingaru yuwaa Apanllish pang' maachi wayarana, anoo yarangu, misha kurakshutam pang' pshtuyaru, maachtaa ichingaru yarangiya. Apanll waana kamanirangu, ambiritam ashiru tatsamoorangiya. Yuwaatsitam kurak Saramun Apanllish pang' wayarangu, oroo misha urutam mburshimash taarangu anoo ashpari maachtaa pátangaranganaya. ¹⁴ Ashirangu, ashpari tputsee Irusarinash kurakawaa, mishat kizpureewaatstam sundaru, mishat kurikee táchimapaneetstam, mishat yandampaneetstam, mishat ngusambaa tinamapaneetstam ashpari putarangiya. Washunand 10 mil tputsee putaranganaya. Pukireewaatsinaa tputs, Waani mzatseewaa tarawaztachinllinpa, átu, kasarangiya. ¹⁵ Nabukodonosorsha kurakaa Jowakima, wanirpatari, wizanlleetstam ichingaru wipunashpatari putarangitamta. Sundarootstam urkar ksutamapanee, misha yuwaa kizpureew kurakaw taarangana, anoowaa ashpari putayaranllu, Babiloniyapsha machtarangiya. ¹⁶ Washunand kurakawaa 7 mil yamarangiya. Anumunsha minumtam mil ngusampa tinamapanee, misha kizpureewaa sundaru ichingaru waanpeetam machtarangiya. ¹⁷ Sheeru, kurak Babiloniyshuch Mataniyasaa,

Jowakimaa zoonll wip kurakaam ínarangiya. Kurakaam ínayaru, surootssha Sidikiyasa átu yásamarangya.

Ashiriya, na kamaneena yuwaa kurakaa kasi-yarusin, Jowakimaa putarangana anootsi.

Ashiriya, na kamanchintspa yuwaa kurak Sidikiyas kurakaam kinarangu anootsi

¹⁸ Sidikiyas masachirini 21 taaru anush kurakaam kinarangiya. Uwsha 11 masach yaktash Irusarinash taarangiya. Wanirsha sur Jamutalamuncha Jeremiyas wipa. An kiz Libnashchimuncha tputsi. ¹⁹ Ansha wip kurakaam kinarangu, aranginasha Apanllee kuk kapeetarangiya. Apanllee aranginasha tayutaritarangya. ²⁰ Ashirucha, anumand Apanll kapung tsiyantarangu, Irusarinaa, misha Utaáchcheetstam ashparita izuuru-maamarisha kasarangya. Ndusha pakchiyam istamaam zandarangu, Waani yachambanllina, tárangeya.

Ashiriya, na kamaneena yuwaa Sidikiyas kurakaam kinarangu anootsi.

25

Ashiriya, na kamanchintspa yuwaa Irusarinaa minshuchsha kurak tayutaritarangu anootsi

[Zapishsha, kurak Sidikiyas Babiloniyshuchpa kurak yusur pachamaam zandaranganaya.]

¹ Zar diesash, tsupsha octubrishu, Sidikiyas 9 masach kurakaam kinaru taachu, anush Nabukodonosorpa tsiyantarangusin, Nabukodonosorsha wasundururpa ichingaru shitungaranganaya. Irusarinash tsap

kuseeruni, yaktaa taturpiyaruni, tasaseeruni, tandapunuzimun kárimaam káringashish wayayaruni, izuuru tputsee pachayaruni, kasiyani, táranganaya. ² Ashiriya, Irusarinash kusarangsin, yaktaa taturpiyarusin, tsimbun masach ksutaranganaya. Ashirangsin, Sidikiyas 11 masachsha tatsamoorangu, yuw kurakaam kinarangu, ³ an tsupsha ipunpunarshini, zar nuevish, yuwariz maringarangiya. Amb ashirangu, ichingarusin tputs watungash pishtarangiya. ⁴ Ashirucha, tputsshitisin yaktaa watandpunu wach zangamichsha wayaranganaya. Itaru, Nabukodonosorsha wasundurur nda suwamaam ksutarangtaatssin, ashiritaa psaan kurak Sidikiyas wasundururpa ashparitin suwaranganaya. Minnunguchich tandapunuz watandaram shitungaranaya. Yap chap tatsumim kurak nashamangshini taarangu, annungiri shitungarandsin, Ortagup kung ngoots suwasuwaranganaya. ⁵ Itaru, Kaldewshuchsha, Nabukodonosor wasundur tsiyatssee mazinarangusin, Sidikiyasaa tachitaranganaya. Apus Jericoyush watandsash kamatarangsin, kurakaa Sidikiyasaa putaranganaya. Sidikiyas wasundurur Kaldewshuchhee parangusin, urka-ree kasayarusin, suwasuwarangusin, ashpartin pseertaranganaya. ⁶ Kaldewshuchsha sundar Sidikiyasaa putayarandsin, Babiloniyashuchip-sha kurak Riblap yakat machiranganaya, yap Nabukodonosor Hamatap tsap taarangu ambi. Ashiriya, anush wayayarusin, kuraksha Nabukodonosor, Sidikiyasaa waneengtsa, tárangiya. ⁷ Sidikiyas waana paru, wipaa

ashparit wayarpunoo ktsupeerus pchangints. Sheerus, wapareetssha Sidikiyasaa ashpari wachoo yuxungints, tárangeiya. Ashiriya, wasundurursha ambiritam ashiranganaya. Sheersin, uwee kamuriyarandsin, yakat Babiloniyp machtaranganaya.

Ashiriya, na kamaneena yuwaan kurakaa Sidikiyasa putarangana anootsi.

Ashiriya, na kamanchintspa yuwaan yakat Irusarinash Apanllee pang' ashchiri tirooranganana anootsi

⁸ Tsupsha zameeturinshini, zarsha 7, yuwash kurak Nabukodonosor masach 19 kurakaam kinaru taachu, anush Nebosaradan sundar urkari ichingaroo sundaroo ksutku, an yaktash Irusarinush kusarangiya. ⁹ Anush ichingaru Apanllee pang', misha kurakaatsitam pang', misha kurakaw kizpureewatam taarangana anoowa pang' tirooranganaya. ¹⁰ Ashirangsin, sundar Kaldewshuchsha anshutam kusarangsin, anpasha sundar ipunarangsi, uwshtisin Irusarinaa yakat watandpunu ashchiri kapeetaranganaya. ¹¹ Anumunsha, sundar urkar Nebosaradan ichingaroo Irusarinshuchee katuchimawaatstaa tputs putarangu, ashparita yakat Babiloniyp machirangiya. Ashpatam maachtaa tínamapan taarangana, misha ashpatam Nabukodonosoraa chinarangana, anootsim ichingaru machtarangiya. ¹² Kizpur pukireewaatsinaa tputs kasarangiya. Waani uwnaarsin mzatsee, misha kizarunaatstam tatsumawaa tarawaztaksin taachinllinpa átu kasarangiya. ¹³ Anumunsha sundar

Kaldewshuch Apanllish pang' pshturangusin, maachee yuw ngusambpa tinarangana anoo ashpari pátangaranganaya. Ítaru, patuzinazeewaa, misha ngusamb chumbeepimash wanasirimash kungoom kanapumaam tínam taarangu anootsimsha Babiloniyaam yátaranganaya.

¹⁴ Mishat, yuwaatstam kapung murits ashiru kayatam puzachee xanatarangana anootstam, mishat mbasshisheetstam tinamaa, ichingaru ngusambpat chumbeepimashpa tinarangana anoo Apanllish pang' ichingaru yaranganaya.

¹⁵ Anumunsha, kuraksha sundar urkar ichingaru yuw oroo, misha ortam mburshimashi, mishat yuwatam kapung murits tamapari ashiru anush tazutarana, misha yuwaatstam mangaw kayatam kapungoow zapan taarangu, anoo ichingaru yarangiya.

¹⁶ An ngusamb chumbeepimashi washunand táchimaam pinasamuna. An ichingaru Saramunariní tínamarini.

¹⁷ Patuzinaz tsimbunu íwarini 8 metoroo kánuru taarangiya. Anumun iwaz tsimbun metor wamanirini únambee wayamaam ngusambpa kayatarangana. Anumunsha yamus tamapari ashiru kuripitaraa, kuripitaraa ashiru, munlliwanus tamapari ashiru kambeerutaru kizpur wanásir chumbichumbtangatu iripcheew tinaranganaya.

Anootssha ashpari Babiloniyp itutseerandsin yátaranganaya.

Ashiriya, na kamaneena yuwaa Apanlee pangus ashchiri kapeetarangana anootsi.

*Ashiriya, na kamanchintspa yuwaa Utaáchchee
tputs ashpari pacharangana anootsi*

18 Nebosaradansha, kurak sundar urkar tputsee putarangitamta, apanllpanee urkar Sofoniyasaatsi, misha Sofoniyasaa wipunashee, misha tuchip tputs yuwaa Apanllee pang' washitungash ksutamapan taarangana, anoo ichingaru putayarusin, machtaranganaya.

19 Anumunsha, Irusarinshuchee sundaru urkari, misha zameetpa kuraka wipunash, misha sundaroom ínampani putarangitamta. Sheersin, 60 tputs kurakaw tsipasawaa putarangitamsinaya. **20-21** Kurak Nebosaradan ashparitaa tputs Babiloni yapsha, Ribla yakat, Hamatap kung machtaranganaya. Anushsha kurakash Nabukodonosorash yámandarangusin, kuraksha tputsee parangu, uwsha ashparita pachamaam kamachtarangiya. Sundarsha anuritam ashpari tputsee pacharanganaya. Ashirangsin, Utaáchchee tputs izuuru kachingeersin kasaranganaya.

Ashiriya, na kamaneena yuwaa undarar Utaáchchee tputs ashpari kachingarangu anootsi.

Ashiriya, na kamanchintspa yuwaa Utaáchich tputs pakchimshitisin Ijiptop suwarangana anootsi

22 Babiloni shuch kurak Nabukodonosor, Guedaliyasaa Ahikamarinee wip, Safanarinee wachinllin kurakaam ínarangiya. Kurak Nabukodonosor Utaáchchee tputs pakchimsha kasarangu anoom ksutamaama. **23** Ashiriya, Utaáchich sundar urkar tiptsirpa anoo tsiyatsis mazinarangusin, yaktap Misap kurakpa Guedaliyaspa tsiyatamaam naataranganaya. Anshitisin tputs yuw naatarangana an sur

Ismael, Netaniyas wipa, misha Johanan Karearin wipa, misha Serayas, Tanhumetarini wipa, yakat Netofashchi, anumunsha Maakashuch tputs Jaasaniyas, ashpisin tputs tiptsirpatatam ipunirandsin naataranganaya. ²⁴ Kuraka Guedaliyas anpa tputs wanasis tsiyatarangiy. Ashiriya, tsiyatku, Nuw siyaa zurampatari táchintspa. Siy Kaldewshuchee sundar urkar punirintspa. Nishurisha yakat taayarus, Babiloniyshuchee kurak kuk payukus, kurakaam istakus, kisshapari taatssa, tárangeiy. ²⁵ Tsup arangtach tsimbun matayaru yakayaru, anush Ismael, Netaniyas wip, Elisam wachinllin, Dapiyarinchich tputs, anshitisin tputsee chung yamayaru, anpa ipuneerandsin naataranganaya. Sheerandsin, anush yakat kusarangsin, anshuchee kurakaa Guedaliyasa pacharanganaya, misha Utaáchcheetstam tputsi, misha Kaldewshuchetstam tputsi, misha tputs nllitaritaw taarana anpatari pacharanganaya. ²⁶ Itaru, Mispashuch katuchim tputs ichingarusin Kaldewshuchee kapung punirangusin, nllurtam, misha wachinatam, misha sundaruwatam urkar ichingarusin ashparitin Ijiptopsha suwasuwaranganaya.

Ashiriya, na kamaneena yuwaa Ijiptop tsap suwarangana anootsi.

*Ashiriya, na kamanchintspa yuwaa Jowakima
tumanamash tashitungarangu anootsi*

²⁷ Utaáchich urkar Jowakim Babiloniyah tsap tumanimash 37 masach taachu, tsupi 12, fecha 27 zar tushiyramchu, anush minsha

tputs Evil-merodak sur Babiloniyshucheem kurak kinarangiya. Ansha Jowakimaa kizpur chinarrangu, tumanshishish ishitungarangiya. ²⁸ Ashirangu, Jowakimpa wanasis tsiyatatarangsin, kapung chinarrangiya. Anush Babiloniyash kurak putamaw zapantaa taarangsin, itaru Jowakimaa kapung chinarrangu, wanasis naparangiya.

²⁹ Amb kurak ashirangu, Jowakimsha anush kissha taarangiya. Tumanamash kamartarangu, anoo yusheeru, nllitarisha wanasis kamartarangu, kurakpasha washunand kuxineersin, katungaranganaya. Amb ashirangu kissha anush taarangiya. ³⁰ Anumun arangeem kurak Babiloniyshuch Jowakimaam watungasheemsha ichingaru zar katungamaam wayarangiya. Ashirangu, kissha taaku, wachinayaru, anshurisha Babiloniyash tsiparangiya.

Ashiriya, na kamaneena yuwa kurak Jowakim Babiloniyash tsap tsiparangu anootsi.

[Wapparee. Watamcha tsiyatsis yuw Utaáchchee urkar kuzizimun taarangana ano.]

**Apanlli Kuku
New Testament in Candoshi-Shapra
(PE:cbu:Candoshi-Shapra)**

copyright © 2010 Wycliffe Bible Translators, Inc.

Language: Candoshi-Shapra

Translation by: Wycliffe Bible Translators, Inc.

Candoshi-Shapra

cbu

Peru

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Candoshi-Shapra

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022

855c1646-aaa4-5dab-a701-8197de4af05f